



凡 5
卷



遊記第八册上

江陰徐宏祖霞客著

子

寄介立



同邑

季夢良會明編

後學杜一鳴鳳喈

揚名時凝齋閱

族孫徐

鎮筠峪

重校

滇遊日記八

己三月初一日何長公以騎至文廟前再饋滄為包乃出南門一里過演武場大道東南去乃由岐西南循西山行四里西山南盡有水自西峽出即鳳羽之流也其水頗大南即天馬山橫夾之與西山南盡處相峙若門水出其中東注茈碧湖南坡墜間抵練城而南入普陀崆路循西山南盡處溯水

而入五里北崖忽石峰壁立聳首西顧其內塢稍開有邨當聳首下塢中是名山關聳首之上有神宇踞石巔望之突兀甚蓋卽縣後山自三台分支南下此其西南盡處也其內大脊稍西曲南與天馬來成東西塢循溪北崖間又三里餘西抵大脊之下於是折而南一里渡澗東循東山南行一里爲悶江門哨有守哨者在路旁又南二里有小山當峽而踞扼水之吭鳳羽之水南來鐵甲塢之澗西出合而搗東崖下路乃緣崖襲其上二里出扼吭之南邨居當坡東若縮其口者由是邨南山塢大開西爲鳳羽東爲啟始後山夾成南北大塢其勢甚開三流貫其中南自上駟北抵於此約二十里皆

良田接塍縮谷成邨曲峽通幽入靈臯夾水居古之朱陳邨桃花源寥落已盡而猶留此一奧亦大奇事也循東山而南爲新生邑共五里折而西度塢中截塢五里抵西山鳳羽之下是爲舍上盤古之鳳羽縣也今有巡司一流一土土尹姓名忠號懋亭爲呂揮使夢熊之婿呂夢熊先馳使導爲居停而尹以捕緝往後山其內人出飯待客甚豐薄暮尹返更具酌設鼓吹焉是夜大雨迨曉而雪滿西山

初二日晨滄後尹具數騎邀余遊西山蓋西山卽鳳羽之東垂也條岡數十支俱東向蜿蜒而下北爲土主坪南爲白王寨是日飯於白王寨北支帝釋寺中其支連疊三寺而俱無

僧居言亦以避寇去也從土主廟更西上十五里卽關坪爲

鳳羽絕頂其南白王廟後其山更高望之雪光皚皚而不及

登鳳羽一名烏弔山每歲九月烏千萬爲羣來集坪間皆此地所無者土人舉火烏輒投之

初三日尹備騎命四人導遊清源洞晨飡後卽行循西山南行五里過一邨有山橫亘塢南大塢至是南盡而分爲二峽西峽路山馬子哨通漾濞有一水出其中東峽路由花甸哨出洪珪山有二水出其中其山蓋南自馬子哨分支北突者由其北麓二里東降而涉塢過上駟邨渡三澗三里東抵一邨復上坡循東山南行一里餘渡東澗之西乃南躡坡岡則東之蠟坪廠山其廠山鑛山之東卽鄧州與西之橫亘山又夾成小塢

南行里餘乃折而東逾一坳共一里東向下忽見一水自壑底出卽東澗之上流出自洞下者也亟下壑底睹其水自南穴出涌而北流成溪其上崖間一穴大僅二三尺亦北向上書清源洞三字爲鄧川縉紳楊南金筆水不從上洞出由洞口下降而入亦不見水或曰行數里後乃聞水聲其入處逼仄深墜恰如茶陵之後洞導者二一人負松明一筐一人然松明爲炬以入南入數丈路分爲二下穿者爲穴上躋者爲樓樓之上復分二穴穿右穴而進其下甚削陷峽頗深卽下穿所入之峽也以壁削路阻不得達乃返穿左穴而達其內曲折駢夾高不及丈闊亦如之而中多直豎之柱或連杖剖楹或中盤旁

叢分合間錯披隙透窾頗覺靈異但石質甚瑩白而爲松炬所薰皆黑若煙煤着手卽膩不可脫蓋其洞旣不高曠煙霧莫散而土人又慣用松明便於僂僕而益增其煤膩蓋先是有識者謂余曰是洞須歲首卽遊爲妙過二月輒爲煙所黑余問其故曰洞內經年人莫之入煙之舊染者旣漸退而白乳之新生者亦漸垂而長故一當新歲人競遊之光景甚異從此至二月遊者已多新生之乳旣被採折再染之垢愈益薰蒸但能點染衣服無復嶺其光華矣余不以其言爲然至是而知洞以低故其乳易採遂折取無餘其煙易染遂薰蒸有積其言誠不誣也透柱隙南入漸有水貯柱底盤中其盤

皆石底迴環大如盆盎類似粵西洞中仙田之頭但不能如其多也約進半里又墜穴西下其深四五尺復夾而南北下平上湊高與闊亦不及丈南入三丈而止北入十餘丈亦窘縮不能進乃復出升墜穴之上尋其南隙更披隘以入入數丈洞漸低乳柱漸逼俯膝透隙匍匐愈難復返而出由樓下坑內批隙東轉又入數十丈其內高闊與南入者同而乳柱不能比勝旣窮乃西從下坑透穴出由坑仰眺其上稍覺崆峒卽入時由樓上俯瞰處旣下穴出漸見天光乃升崖出口滿身皆染淄蒙垢矣乃下濯足水穴之口踞石而浣水從亂穴中汨汨出遂成大溪北去清冷澈骨所留二人炊黃梁於

洞外者亦熟以所攜酒脯箕踞啖洞前仰見天光如洗四山如城甚愜幽興飯後仍逾西岫稍南遵花甸路遂橫涉中溪西上橫亘山之東坂沿山陟隴五里下出上駟邨之西仍循西山北行一里過一邨遂由小徑遵西山隴半搜剔幽奧上下岡坂十餘里抵暮還宿於尹宅

初四日尹備數騎循西山而北三里盤西山東出之嘴又北半里忽見山麓有數樹撐空出馬足下其下水聲淙淙出樹間則泉穴自山底東透隙而出也又北半里有坑自北山陷墜成峽涉之稍東又盤一嘴又三里而至波大邑倚西山而聚廬亦此間大聚落也由邨北墜坑而下橫涉一澗又北上

逾岡三里而下是爲鐵甲場有溪自西山東注邨廬夾之前閩江門南當峽扼水小山又東踞爲此中水口南北環山兩支復交於前又若別成一洞天者過溪上北山此山自西山橫拖而來爲鐵甲場龍砂實鳳羽第三重砂也東東溪流最爲緊固其西南之麓卽鐵甲東北之麓卽閩江門鳳羽一川全以此爲鎖鑰焉騎登其上還飯於鐵甲場居民家置二樽於架上下煨以火插藤於中而遞吸之屢添而味不減其邨氓慣走緬甸皆多彝貨以孩兒茶點水饗客茶色若胭脂而無味下午仍從波大邑盤泉穴山嘴復西上探其腋中小圍山風雨大至沾濡而返

初五日晨起欲別尹君以是日清明留宴於塋山卽土主廟北新塋也坐廟前觀祭掃者紛紛奢者攜一猪就塋間火炕之而祭貧者攜一鷄就塋間弔殺之亦烹以祭迴憶先塋已三違春露不覺憮然亟返而卧

初六日余欲別而尹君謂前邀其岳呂夢熊期今日至必再暫停適邨有諸生許姓者邀登鳳羽南高嶺隨之下午返而呂君果至相見甚懽

初七日尹君仍備騎同夢熊再爲清源洞之遊先從白米邨截川而東五里遵東山南行山麓有騎龍景帝廟廟北有泉一穴自崖下湧出崖石嵌磊巨木盤糾清泉漱其下古藤絡

其上境甚清幽土人之耕者見數騎至以爲追捕者俱釋耜而趨山走險呼之趨益急又南五里而抵清源洞不復深入攬洞前形勢仍西渡中溪遍觀西山形勝而返下午余苦索別呂君代爲尹留甚篤是日宴張氏兩公子客去猶與呂君洗盞更酌陳樂爲胡舞曰緊急鼓

初八日同夢熊早飯後別尹君三十五里抵浪穹南門夢熊別去期中旬晤榆城余入文廟命顧僕借炊於護明寺而後往候何六安何公待余不至己先一日趨榆城矣余乃促何長君定夫爲明日行計何長君留酌書館復汲湯泉爲浴而

卧

初九日早飯於何處比行陰雲四合大有雨意何長君次君仍以盒餞於南郊南行三里則鳳羽溪自西而東注架木橋度之又南里餘抵天馬山麓乃循而東行風雨漸至東里餘有小阜踞峽口之北曰練城置浮屠於上爲縣學之案此縣普陀崆水口既極逼東而又天生此一阜中懸以鎖鑰之莖碧湖洱源海及觀音山之水出於阜東鳳羽山之水出於阜西俱合於阜南是爲三江口由其西望之而行又二里將南入峽先有木橋跨其上流度橋而東應山鋪之路自東北逾橫山來會遂南入峽口是峽東山卽靈應山西下之支西山卽天馬山東盡之處兩山逼湊急流搗其中爲浪穹諸水所

由出路從橋東卽隨流南入峽口有數家當峽而居是爲巡檢司時風雨交橫少避於跨橋樓上樓圯不能蔽寒甚南望峽中風陣如舞北眺凌雲諸峰出沒閃爍坐久之雨不止乃強擔夫行初從東崖南向行普陀崆中一里峽轉而西曲路亦西隨之一里復轉而南一里有一家倚東崖而居按郡志有龍馬洞在峽中疑卽其處而雨甚不及問又南江流搗崆中愈驟崆中石聳突而激湍或爲橫檻以扼之或爲夾門以束之或爲齟齬或爲劍戟或爲犀象或爲鷲鳥百態以極其搏截之勢而水終不爲所阻或跨而出之或穿而過之或挾而灤之百狀以盡超越之觀時沸流傾足下大雨注頭上兩

崖夾身一綫透腋轉覺神王二里顧西崖之底有小穴當危
崖下東向與波流吞吐心以為異過而問熱水洞何在始知
卽此穴也先是土人言普陀崕中有熱水洞門甚隘而中頗
寬其水自洞底涌出如沸湯人入洞門為熱氣所蒸無不泱
汗有疾者輒愈九炁臺止可煮
耶而此可糜肉余時寒甚然穴在崕底甚深
且已過不及下也又南一里峽乃盡前散為塢水乃出崕而
路乃下坡半里抵塢是為下山口蓋崕東之山卽靈應南垂
至是南盡餘脉邈而東乃南衍為西山灣之脊崕西之山南
自鄧川西逆流而上中開為南北大塢而彌苴佉江貫其中
焉峽口之南有邨當塢是為鄧川州境於是江兩岸垂楊夾

堤路從東岸行六里餘而抵中所時衣已濕透風雨不止乃

覓逆旅沸湯為飯入叩劉陶石名一金父以鄉荐為涿州守
卒於任前宿其來鳳莊者

劉君出酒慰寒遂宿其前樓出楊太史二十四氣歌相示書

法帶趙吳興而有媚逸之致東蘇川文士本中

初十日雨止而餘寒猶在四山雪色照人迨飯而擔夫逸去

劉君乃令人覓小舟於江岸之西覆鐘山下另覓夫肩行李

從陸行言西山下有湖可遊欲與余同泛也蓋中所當彌苴

佉江出峽之始其地平沃居屯甚盛築堤導江為中流所東

山之下有水自焦石洞下沿東山經龍王廟前匯為東湖流

為閩地江是為東流所西園之下有水自鐘山石穴中東出

遊記 卷八
八
爲綠玉池南流爲羅蔣江是爲西流所故其地亦有三江之名然練城之三江合流此所之三江分流雖同南行注洱海而未嘗相入也余與劉君先西過大石梁乃跨彌苴佉江上者西行陞中一里有橋跨小溪上卽羅蔣江也橋之北水塘漱灑青蒲蒙茸橋之南溪流如線蛇行兩畦間因踞橋待舟北望梅花邨綠玉池在里外而隔浦路濕舟至便行竟不及北探也此地名中所東山之東羅川之上亦有中所乃卽此地之分屯也余昔自雞山西下所托宿處大約此地正東與雞鳴寺西與鳳羽舍上盤相對但各間一山脊耳橋西諸山皆土而峭削殊甚時多崩圯鐘山峙橋西北溪始時橋正西

蓋鐘山突而東溪始環而西溪始之上有水一圍滙絕頂間東南墜峽而下高挈眾流之祖故以溪始名下舟隨溪遵其東麓南行兩旁陞低於溪壅岸行水於中其流雖小而急此小舟如葉止受三人其中彌苴佉江似可通大舟而流急莫從二里則兩岸漸平而走沙中壅舟膠不前劉君與余乃登岸行隴舟人乃凌波曳舟五里乃復下舟少曲而西半里遂南挺而下湖湖中菱蒲汎汎多有連蕪爲畦植柳爲岸而結廬於中者汀港相間曲折成趣深處則曠然展鏡夾處則窅然罨畫脩脩有江南風景而外有四山環翠覺西子湖又反出其下也湖中渚田甚沃種蒜大如拳而味異鶯粟花連疇接隴於黛柳鏡波之間景趣殊

勝三里湖盡西南瞻鄧川州治當山腋曲間居廬不甚盛而無城其右有崩峽倒衝之昔年遷於德源城以艱於水復還故處大路在湖之東彌苴佉江西岸若由陸路行不復知此中有湖併湖中有此景也又南行港間一里餘有路自東橫亘於西山即達州治之通道也堤之下連架三橋以洩水舟由堤北東行一里穿橋而南又半里有小橋曰三條橋即北從中所來之大道也水穿橋東路度橋南俱南向行初約顧僕以行李待此而不在劉君臨岐踟躕時已過午腹餓余揮手別劉君令速返余遵大道南行始見路東有小山橫亘塢中若當門之檻截塢而出者是爲德源城蓋古跡也

按志昔六詔未

一南詔延五詔長爲星回會鄧賧詔之妻勸夫莫往曰此詐也必有變以鐵環約夫臂而行後五詔俱焚死遺屍莫辨獨鄧賧以臂約認之還後有欲強妻之復以計山橫塢中不甚高而東西兩端各不屬於大山山之西與卧牛相夾則羅蒔江與鄧川驛路從之山之東與西山灣山相夾則彌苴佉悶地二江從之南三里從其西峽傍卧牛山東突之嘴行卧牛山者鄧川東下南砂之臂也一大峰一小峰相屬而下大者名卧牛小者名象山土人以象小而牛大今俱呼爲象山云湊峽之間有數十家當道是爲鄧川驛過驛一里上盤西山之嘴始追及僕擔遂南望洱海直上關而北而德源橫亘之南尚有平疇南接海濱德源山之東大山南下之脊至是亦

低伏東轉而直接海東大山蓋萬里之脈至洱海之北而始
低渡云山嘴南仍依西山南下二里下度一峽口其峽自西
山出橫涉之而南上坡間又二里有坊當道逾坡南行始與
洱海近共五里西山之坡東向而突海中是爲龍王廟南崖
之下有油魚洞西山腋中有十里香奇樹皆爲此中奇勝而
南瞻沙坪去坡一里而遙急令僕擔先覓寓具滄余并探此
而後中食乃從大路東半里下至海崖其廟東臨大海有漁
戶數家居廟中廟前一坑下墜架石度其上如橋從石南墜
坑下丈餘其坑南北橫二丈東西闊八尺其下再嵌而下則
水貫峽底小魚千萬頭磔沓於內漁人見余至取飯一掌撒

則羣叢而喂之蓋其下亦有細穴潛通洱海但無大魚不過
如指者耳油魚洞在廟崖曲之間水石交薄崖內遜而抱水
東向如缺崖下挿水中腔洞透漏每年八月十五有小魚出
其中大亦如指而周身似油爲此中第一味過十月復烏有
矣崖之後石聳片如芙蓉裂瓣從其隙下窺之多有水漱其
底蓋其下皆潛通也稍西上有中窪之宕當路左其東崖漱
根亦有水外通與海波同爲消長焉從其側交大路而西逾
坡不得路望所謂三家邨者尙隔一箐踞西峽間乃西半里
越坡而下又西半里涉箐而上乃沿西山南向而趨一里漸
得路轉入西腋半里抵三家邨問老嫗指奇樹在邨後田間

又半里至其下其樹高臨深岸而南餘半空矗然挺立大不
 及省城土主廟奇樹之半而葉亦差小其花黃白色大如蓮
 亦有十二瓣按月而閏增一瓣與省會之說同但開時香聞
 遠甚土人謂之十里香則省中所未聞也榆城有風花雪月
 四大景下關風上關花上關以此花著按志榆城異產有木
 蓮花而不注何地然他處亦不聞豈即此耶花自正月抵二
 月終乃謝時已無餘瓣不能聞香見色惟撫其本辨其葉而
 已乃從邨南下坡共東南二里而至沙坪聚落夾衢入邸舍
 晚滄已熟而劉君所倩擔夫已去乃別倩為早行計
 十一日早炊平明夫至乃行由沙坪而南一里餘西山之支

又橫突而東是為龍首關蓋點蒼山北界之第一峰也鳳羽
 南行度花甸哨南嶺而東北轉者為龍王廟後諸山迤邐從
 鄧川之卧牛溪始而北盡於天馬南峙者為點蒼而東垂北
 顧實始於此所以謂之龍首一統志列點蒼十九峰次第自南而北則是反以龍尾為首也
 當山垂海錯之處鞏城當道為榆城北門鎖鑰俗謂之上關
 以據洱海上流也入城北門半里出南門乃依點蒼東麓南
 行高眺西峰多墜坑而下蓋後如列屏前如連袂所謂十九
 峰者皆如五老比肩而中墜為坑者也南二里過第二峽之
 南有邨當大道之右曰波羅邨其西山麓有蛺蝶泉之異余
 聞之已久至是得土人西指乃令僕擔先趨三塔寺投何巢

阿所棲僧舍而余獨從邨南西向望山麓而馳半里有流泉
淙淙溯之又西半里抵山麓有樹大合抱倚崖而聳立下有
泉東向漱根竅而出清冽可鑿稍東其下又有一小樹仍有
一小泉亦漱根而出二泉匯爲方丈之沼卽所溯之上流也
泉上大樹當四月初卽發花如蛟蝶鬚翅栩栩然與生蝶無異
又有真蝶千萬連鬚鈎足自樹巔倒懸而下及於泉面繽紛
絡繹五色煥然遊人俱從此月羣而觀之過五月乃已余在
粵西三里城陸參戎卽爲余言其異至此又以時早未花詢
土人或言蛟蝶卽其花所變或言以花形相似故引類而來
未知孰是然龍首南北相距不出數里有此二奇葩一恨於

已落一恨於未蒞皆不過一月而各不相遇乃折其枝圖其
葉而後行已望見山北第二峽其口對逼如門相去不遠乃
北上躡之始無路二里近峽南乃得東來之道緣之西向上
躡其坡甚峻路有樵者問何往余以尋山對一人曰此路從
峽南直上乃樵道無他奇南峽中有古佛洞甚異但懸崖絕
壁恐不能行無引者亦不能識又一老人欣然曰君旣萬里
而來不爲險阻余何難前導余乃解長衣併所折蛟蝶枝負
之行共西上者三里乃折而南又平上者三里復西向懸躡
又二里竟凌南峽之上乃第三峽也於是緣峽上西行上下
皆危崖絕壁積雪皚皚當石崖間旭日映之光艷奪目下瞰

南峰與崖又駢峙成峽其內墜壑深杳其外東臨大道有居廬當其平豁之口甚盛以此崖南下俱削石故必由北坡上而南轉西入也又西上二里崖石愈截業對崖亦穹環駢連蓋前猶下崖相對而至此則上降俱迴合矣又上一里盤崖漸北一石橫度足下而上崖飛鶩刺空下崖倒影無底導者言上崖腋間有洞曰大水下崖腋間有洞曰古佛而四睇皆無路導者曰此度石昔從上崖墜下橫壓下洞之上路爲之塞遂由度石之西攀枝直墜其下果有門南向而上不能見也門若裂罅高而不闊中分三層下層墜若罾井俯窺杳黑而不見其底昔曾置級以下溝燈而入甚深今級廢燈無不

能下矣中層分瓣排櫺內深三丈石潤而潔洞狹而朗如披帷踐榭坐其內隨峽引眺正遙對海光而洞門之上有中垂之石儼如龍首倒懸寶絡中挂上層在中洞右崖之後盤空上透望頗窳窳而中洞兩崖中削內無從上其前門夾處兩崖中湊左崖前削石痕如猴少刻其端首大如卵可踐猴首飛度右崖以入上洞但右崖欹側與左崖雖中懸二尺餘手無他援而猴首之足亦僅點半趾躍陟甚難昔亦有橫板之度而今無從覓余宛轉久之不得度而下導者言數年前有一僧棲此崖間多置佛故以古佛名自僧去佛移其疊級架梯亦久廢無存今遂不覺閉塞余謂不閉塞不奇也乃復上

度石從其門捫崖直上崖亦迸隙成門門亦南向高而不闊
與下洞同但無其層疊之異峽左右片下垂擊之作鐘鼓聲
北向入三文峽窮而躡之上有窪當後壁之半外聳石片中
列如壘曰以手摸之內圓而底平乃天成貯泉之器也其上
有白痕自洞頂下垂其中如玉龍倒影乃滴水之痕曰側有
白磁一乃昔人置以飲水者觀玩既久乃復下度石導者乃
取樵後峽去余乃仍循崖東下三里當南崖之口路將轉北
見其側亦有小岐東向草石間可免北行之迂乃隨之下其
下甚峻路屢斷屢續東下三里乃折而南又平下三里乃及
麓渡東出之澗澗南有巨石高穹牧者多踞其上見余自北

崖下爭覘眺之不知爲何許人也又南一里半及周城邨後
乃東出半里入夾路之衢則龍首關來大道也時腹已餒問
去榆城道尚六十里亟竭蹶而趨遙望洱海東灣蒼山西列
十九峰雖比肩連袂而大勢又中分兩重北重白龍首而南
至洪圭其支東拖而出又從洪圭後再起爲南重自無爲而
南至龍尾關其支乃盡洪圭之後卽有峽西北通花甸洪圭
之前其支東出者爲某邨又東錯而直瞰洱海中爲鵝鼻嘴
卽羅刹石也不特山從此疊兩重而海亦界爲兩重焉十三
里過某邨之西西瞻有路登山爲花甸道東瞻某邨居廬甚
富又南逾東拖之岡四里過二鋪又十五里而過頭鋪又十

三里而至三塔寺入大空山房則何巢阿同其幼子相望於門僧覺宗出酒沃饑而後飯夜同巢阿出寺徘徊塔下踞橋而坐松陰塔影隱現於雪痕月色之間令人神思悄然
十二日覺宗具騎挈滄侯何君同爲清碧溪遊出寺卽南向行三里過小紙房又南過大紙房其東卽郡城之西門其西山下卽演武場又南一里半過石馬泉泉一方在坡岫間水從此溢出馮元成謂其清冽不減慧山甃爲方池其上有廢址皆其遺也志云泉中落日照見有石馬故名又南半里爲一塔寺前有諸葛祠并書院又南過中和玉局二峰六里渡一溪頗大又南有峯東環而下又二里盤峰岡之南乃西向

覓小徑入峽峽中西望重峯罨映最高一峰當其後有雪痕一派獨高垂如正練界青山有溪從峽中東注卽清碧之下流也從溪北躡岡西上二里有馬鬣在左岡之上爲阮尙賓之墓從其後西一里躡峻凌岸其岸高穹溪上與對崖駢突如門上聳下削溪破其中出從此以內溪嵌於下崖夾於上俱逼仄深窄路緣崖端挨北峰西入一里餘馬不可行乃令從者守馬溪側顧僕亦止焉余與巢阿父子同兩僧溯溪入屢涉其南北一里有巨石蹲澗旁兩崖巉石俱堆削如夾四眺內門雙聳中劈僅如一綫後峰垂雪正當其中掩映層疊如挂幅中垂幽異殊甚覺宗輒解筐酌酒凡三勸酬復西半

遊記 八册上
二
里其水搗峽瀉石間石色光膩文理燦然頗饒煙雲之致於是盤崖而上一里餘北峰稍開得高穹之坪又西半里自坪西下復與澗遇循澗西向半里直逼夾門下則水從門中突崖下墜其高丈餘而下爲澄潭潭廣二丈餘波光瑩映不覺其深而突崖之槽爲水所汨高雖丈餘膩滑不可着足時余狎之不覺見二僧已逾上崖而何父子欲從澗余上余獨在潭上覓路不得遂躡峰槽與水爭道爲石滑足與水俱下傾注潭中水及其項亟躍而出踞石絞衣攀北崖登其上下瞰余失足之槽雖高丈餘其上槽道曲折如削膩滑尤甚卽上其初層其中升降更無可階也再踰西崖下覩其內有潭方

廣各二丈餘其色純綠漾光浮黛照耀崖谷午日射其中金碧交蕩光怪得未曾有潭三面石壁環窩南北二面石門之壁其高參天後面卽峽底之石高亦二三丈而脚嵌巖突下與兩旁聯爲一石若剖半盞並無纖隙透水潭中而突巖之上如簷覆潭者亦無滴瀝拋崖下墜而水自潭中輒東面而溢轟倒槽道如龍破峽余從崖端俯而見之亟攀崖下墜踞石坐潭上不特影空人心覺一毫一孔無不瑩徹亟解溼衣曝石上就流濯足就日曝背冷堪滌煩暖若挾纊何君父子亦百計援險至相叫竒絕久之崖日西映衣亦漸乾乃披衣復登崖端從其上復西逼峽門卽潭左環崖之上其北有覆

崖度空可當亭榭之憩前有地如掌平贅若臺可下瞰澄潭而險逼不能全見既前余欲從其內再窮門內二潭以登懸雪之峰何君輩不能從亦不能阻但云余輩當出待於休馬處余遂轉北崖中垂處西向直上一里得東來之道自高穹之坪來遵之曲折西上甚峻一里餘逾峽門北頂復平行而西半里其內兩崖石壁復高駢夾起門內上流之澗仍下嵌深底路傍北崖削壁無痕不能前度乃以石條緣崖架空度爲棧道者四五丈是名陽橋亦曰仙橋橋之下正門內之第二潭所匯爲石所虧蔽不及見度橋北有疊石貼壁間稍北疊石復北斷乃趨其級南墜澗底底有小水蛇行塊石間乃

西自第一潭注第二潭者時第二潭已過而不知祇望澗中西去兩崖又駢對如門門下又兩巨石夾峙上有石平覆如屋而塞其後覆屋之下又水瀦其中亦澄碧淵渟而大不及外潭之半其後塞壁之上水從上澗垂下其聲潺潺不絕而前從塊石間東注二潭矣余急於西上遂從澗中歷塊石而上澗中於是無纖流然塊石經衝滌之餘不特無汚染而更光膩小者踐之巨者攀之更巨者則轉夾而梯之上矚兩崖危矗直來彌極雄厲漸上二里礪石高穹滑不能上乃從北崖轉陟箐中崖根有小路爲密箐所翳披之而行又二里聞人聲在絕壁下乃樵者拾枯於此捆縛將返見余言前已無

路不復可逾余不信更從叢篁中披陟而西上其處竹形漸
大亦漸密路斷無痕余莽披之去巾解服攀竹爲繩復逾里
餘其下壑底之澗又環轉而北與垂雪後降又界爲兩重無
從竟升聞清碧澗有路可逾後嶺通漾潏豈尙當從澗中歷
塊耶時已下午腹餒甚乃亟下則負芻之樵猶匍匐箚中遂
從舊道五里過第一潭隨水而前觀第二潭其潭當夾門逼
束之內左崖卽陽橋高橫於上乃從潭左攀磴隙上陽橋逾
東嶺而下四里至高穹之坪望西澗之潭已無人跡亟東下
沿溪出三里至休馬處何君輩已去獨留顧僕守飯於此遂
啜之東出三里半過阮墓從墓右下渡澗由澗南東向上嶺

路當南逾高嶺乃爲感通間道余東逾其餘支三里下至東
麓之半牧者指感通道須西南逾高脊乃得復折而西南上
躋望崖而登竟無路可循也二里登嶺頭乃循嶺南西行三
里乃稍下度一峽轉而南松檜翳依淨宇高下是爲宕山而
感通寺在其中焉蓋三塔感通各有僧廬三十六房而三塔
列於兩旁總以寺前山門爲出入感通隨崖逐林各爲一院
無山門總攝而正殿所在與諸房等正殿之方丈有大雲堂
衆俱以大雲堂呼之而已時何君輩不知止於何所方逐房
探問中一房曰斑山乃楊升菴寫韻樓故址初聞何君欲止
此過其門方建醮設法於前知必不在乃不問而去後有人

追至留還其房余告以欲覓同行者其人曰余知其所止必
款齋而後行余視其貌似曾半面而忘從何處諦審之知爲
王賡虞乃衛侯之子爲大理庠生向曾於大覺寺會於遍周
師處者也今以其祖母忌辰隨其父來修薦於此見余過故
父子相諭而挽留余飯焉飯間何君亦令僧來招既飯而暮
遂同招者過大雲堂前北上得何君所止靜室復與之席地
而飲夜月不如前日之皎

十三日與何君同赴齋別房因遍探諸院時山鶻花盛開各
院無不燦然中庭院外喬松修竹間以茶樹樹皆高三四丈
絕與桂相似時方採摘無不架梯升樹者茶味頗佳炒而復

曝不免黝黑已入正殿山門亦宏敞殿前有石亭中立我大

祖高皇帝賜僧無極歸雲南詩十八章前後有御跋此僧自雲

南入朝以白馬茶樹獻高皇帝臨軒見之而馬嘶花開遂蒙

厚管後從大江還故土帝親灑天葩以江行所過各賦一詩

送之又令諸翰林大臣皆作詩送歸今宸翰已不存而詩碑

猶當時所鐫者李中谿大理郡志以奎章不可與文獻同輯

竟不之錄然其文獻門中亦有御製文何獨詩而不可同輯

耶殿東向大雲堂在其北僧爲淪茗設齋已乃由寺後西向

登嶺覓波羅巖寺後有登山大道二一直上西北由清碧溪

南峰上十五里而至小佛光寨疑與昨清碧溪中所望雪痕

遊滇人
中懸處相近卽後山所謂筆架山之東峰矣一分岐向西南
湖寺南第十九澗之峽北行六里而至波羅巖波羅巖者昔
有趙波羅棲此朝夕禮佛印二足跡於方石上故後人卽以
波羅名波羅者乃此方有家道人之稱其石今移大殿中爲
拜臺時余與何君喬梓騎而行離寺卽無樹其山童然一里
由岐向西南登四里逾嶺而西其嶺亦南與對山夾澗爲門
者澗底水細不及清碧而內峽稍開亦循北山西入又一里
北山有石橫疊成巖南臨深壑壑之西南大山前抱如屏插
天而尖峰齒齒列其上遙數之亦得十九又蒼山之具體而
微者巖之西有僧構室三楹庭前疊石明淨引水一龕貯巖

石下亦饒幽人之致僧瀹茗炙麵爲餌以啖客久之乃別從
舊路六里過大雲堂時覺宗相待於斑山乃復入而觀寫韻
樓樓已非故物今山門有一樓差可以存跡問升菴遺墨尙
有二扁寺僧恐損剝藏而不揭也僧復具齋強吞一盃而別
其前有龍女樹樹從根分挺三四大株各高三四丈葉長二
寸半闊半之而綠潤有光花白小於玉蘭亦木蓮之類而異
其名時花亦已謝止存數朶在樹杪而高不可折余僅折其
空枝以行於是東下坡五里東出大道有二小塔峙而夾道
所出大道卽龍尾關達郡城者也其南有小邨曰上陸去郡
尙十里乃遵道北行過七里五里二橋而入大理郡城南門

經大街而北過鼓樓遇呂夢熊使者知夢熊不來而乃郎已
至以暮不及往乃出北門過弔橋而北折而西北二里入大
空山房而宿

十四日觀石於寺南石工家何君與余各以百錢市一小方
何君所取者有峰巒點綴之妙余取其黑白明辨而已因與
何君遍遊寺殿是寺在第十峰之下唐開元中建名崇聖寺
前三塔鼎立而中塔最高形方累十二層故今名爲三塔塔
四旁皆高松參天其西出山門而入有鐘樓與三塔對勢極
雄壯而四壁已頽簷瓦半脫已岌岌矣樓中有鐘極大徑可
丈餘而厚及尺爲蒙氏時鑄其聲聞可八十里樓後爲正殿

殿後羅列諸碑而中谿所勒黃華老人書四碑俱在焉其後
爲雨珠觀音殿乃立像鑄銅而成者高三丈鑄時分三節爲
範肩以下先鑄就而銅已完忽天雨銅如珠衆其掬而鎔之
恰成其首故有此名其左右迴廊諸像亦甚整而廊傾不能
蔽焉自後厯級上爲淨土菴卽方丈也前殿三楹佛座後有
巨石二方嵌中楹間各方七尺厚寸許北一方爲遠山闊水
之勢其波流瀠折極變化之妙有半舟度尾煙汀間南一方
爲高峰疊障之觀其氤氳淺深各臻神化此二石與清真寺
碑跌枯梅爲蒼石之最古者清真寺在南門內二門有碑屏
一座其北跌有梅一株倒撇垂
跌間石色黧淡而枝痕
飛白雖無花而有筆意新石之妙莫如張順寧所寄大空山

樓間諸石中有極其神妙更逾於舊者故知造物之愈出愈奇從此丹青一家皆為俗筆而畫苑可廢矣

張石大徑二尺約五十塊塊塊

皆奇俱絕妙着色山水危峰斷壑飛瀑隨雲雪崖暎水層疊遠近筆筆靈異雲皆能活水如有聲不特五色燦然而已

其後又有正殿庭中有白山茶一株花大如紅茶而瓣簇如之花尙未盡也淨土菴之北又有一菴其殿內外庭除俱以

蒼石鋪地方塊大如方磚此亦舊製也而清真寺則新製以為欄壁之用焉其菴前為玉皇閣道院而路由前殿東鞏門

入紺宮三重後乃為閣而竟無一黃冠居守中空戶圯令人悵然

十五日是日為街子之始蓋榆城有觀音街子之聚設於城

西演武場中其來甚久自此日始抵十九日而散十三省物

無不至演中諸彝物亦無不至聞數年來道路多阻亦減大半矣晨滄後何君以騎同余從寺左登其祖塋過寺東石戶

邨止餘環堵數十圍而人戶俱流徙已盡以取石之役不堪其累也

寺南北俱有石工數十家今惟南戶尙存取石之處由無為寺而上乃點蒼之第八峰也鑿去上層乃得

佳者又西上二里半乃登其塋脈自峰頂連珠下墜前以三塔為案頗有結聚環護之勝還二里至寺後轉而南過李中谿

墓乃下馬拜之中谿無子年七十餘自營此穴傍寺以為飯依而孰知佛宇之亦為滄桑耶由西石戶邨入寺飯同巢阿

趨街子且欲入城訪呂郎而中途雨霰大作街子人俱奔還

余輩亦隨之還寺

十六日巢阿同乃郎往街子余由西門入叩呂夢熊乃郎訊其寓得於關帝廟前蓋西城內之南隅也時已同劉陶石往街相馬矣余乃仍由西門西向一里半入演武場俱結紉爲市環錯紛紜其北爲馬場千騎交集數人騎而馳於中更隊以覘高下焉時男女襍沓交臂不辨乃遍行場市巢阿買文已返劉物呂色無從遇覺宗爲飲於市且覓麵爲飯觀場中諸物多藥多種布及銅器木具而已無足觀者書乃吾鄉所刻邨塾中物及時文數種無舊書也既暮返寺中

十七日巢阿別而歸約余自金騰東返仍同盡點蒼之勝目

下恐漸熱先爲西行可也送至寺前余卽南入城遇劉陶石及沙坪徐孝廉知呂郎已先往馬場遂與同出已遇呂知買馬未就旣而辭呂觀永昌賈人寶石琥珀及翠生石諸物亦無佳者仍覓麪爲飯飯後覓顧僕不得乃返寺而顧僕已先在矣

十八日由東門入城定巾買竹箱修舊篋再過呂寓叩劉呂二君呂命其僕爲覓擔夫余乃返

十九日早過呂寓二君留余飯同劉君往叩王賡虞父子蓋王亦劉戚也家西南城隅內其前卽清真寺寺門東向南門內大街寺乃教門沙氏所建卽所謂回回堂也殿前檻陛窻

櫺之下俱以蒼石代板如列畫滿堂俱新製而獨不得所謂古梅之石還寺所定夫來索金加添余不許有寺內僧欲行余索其定錢仍倩不卽還令願僕往追抵暮返曰彼已願行矣

二十日晨起候夫不至余乃以重物寄覺宗令願僕與寺僧先行余仍入清真寺觀石碑上梅痕乃枯槎而無花白紋黑質尙未能如張順寧所寄者之奇也出南門遂與僧僕同行遵西山而南過五里七里二橋又三里過感通寺前入道其南有三四家夾道曰上睦又南則西山巍峩之勢少降東海彎環之形漸合十里過陽和鋪又十里則南山自東橫亘而

西海南盡於其麓穿西峽而去西峽者南卽橫亘之山至此愈峻北卽蒼山至此南盡中穿一峽西去甚逼而峽口稍曠乃就所穿之溪城其兩崖而跨石梁於中以通往來所謂下關也又名龍尾關關之南則大道東自趙州西向漾潏焉旣度橋出關南遂從溪南西向行三里南北兩山俱逼湊水揭其中如線遙睇其內崇峰北遶蒼山之背壁立彎環掩映殊異破峽而入又二里南峰俱成石壁倒壓溪上北峰一支如渴兕下赴兩崖相粘中止通一綫剖石倒崖始行峽中繼穿石下峽相距不盈四尺石梁橫架其西長丈五尺而狹僅尺餘正如天台之石梁南崖亦峻不能通路出南崖上俯而瞰

之毛骨俱悚又西里餘折而北其溪下嵌甚微又北風雨大至北三里餘數家倚西山下是爲潭子鋪其地爲趙州屬北五里轉而西又北十五里有溪自西峽來入是爲核桃箐渡箐溪又北五里有三四家倚西山下是爲茅草房溪兩旁至此始容蹶崖之賸然猶栝椹之綴於箐底也是日榆道自漾下潯省趙州大理蒙化諸迎者蹠躩雨中其地去四十里橋尚五里計時纔下午恐橋邊旅肆爲諸迎者所據遂問舍而托焉亦以避雨也

二十一日雞再鳴促主者炊起而候飯天明乃行雲氣猶勃勃也北向仍行溪西三里餘有亭橋跨溪上亭已半圯水沸橋下甚急是爲四十里橋橋東有數家倚東崖下皆居停之店此地反爲蒙化屬蓋橋西爲趙州其山之西爲蒙化橋東亦爲蒙化其山之東爲太和犬牙之錯如此至是始行溪東傍點蒼後麓行七里餘有數十家倚東山而廬夾路成巷是爲合江鋪至是始望西北峽山橫裂有山中披爲隙其南者余所從來峽也其北峽者下江嘴所來漾潯峽也其西南下而去者二水合流而下順寧之峽也峽形雖遙分而溪流之會合尚深嵌西北峽中此鋪所見猶止南來一溪而已出鋪北東山餘支垂而西突路北逾之遂併南來溪亦不可見蓋餘支西盡之下卽兩江會合處而路不由之也西下行坡嶺

者四里始有二小流自東北兩峽出既而盤曲西下一澗自東北峽來者差大有亭橋跨之亭已半圯是爲亭水橋蓋蒼山西下之水此爲最大亦西南合於南北二水交會處然則合江之稱實三流不止漾水凜水而已也從橋西復西北逾一小嶺共一里始與漾水遇其水自漾潄來經此卽南與天生橋之水合破西南山峽去經順寧泮山而下瀾滄江路溯其東岸行其東山亦蒼山之北支也其西山乃羅均南下之脈至此而迤邐西南盡於順寧之泮山北行五里有邨居夾而成巷爲金牛屯出屯北有小溪自東山出架石梁其上側有石碑拭而讀之乃羅近溪所題石門橋詩也題言石門近

在橋左因矯首東望忽雲氣迸坼露出青芙蓉兩片挿天拔地駢立對峙其內崇巒疊映雲影出沒令人神躍亟呼顧僕與負僧而二人已前遙追之二里乃及方欲強其還而一僧旁伺問之卽石門旁藥師寺僧也言門上有玉皇閣又有一洞明敞可居欣然願爲居停主乃東向從小路導余五里抵山下過一邨卽藥師寺也遂停杖其中其僧名性嚴坐余小閣上摘蠶豆爲餉時猶上午余欲登山性嚴言玉皇閣躡峰而上十里餘且有二洞之勝須明晨爲竟日遊今無及也蓋性嚴山中事未完旣送余返寺遂復去且以匙鑰置余側余時慕石門奇勝滄飯卽扁其閣東南望石門而趨皆荒翳斷

遊記 八
險竟不擇道也二里見大溪自石門出溪北無路入乃下就
溪中溪中多巨石多奔流亦無路入惟望石門近在咫尺上
下逼湊駢削萬仞相距不逾二丈其頂兩端如一其根止容
一水蓋本一山外屏直從其脊一刀中剖而成者故既難爲
陸陟復無從溯溪徘徊久之乃渡溪南反隨路西出久之得
一徑東向復從以入將及門下復渡溪北溪中縛木架巨石
以渡知此道乃不乏行人甚喜過望蓋東逼門下叢篁覆道
道分爲二一東躡坡磴一南下溪口乃先降而就溪則溪水
正從門中躍出有巨石當門扼流分爲二道襲之而下北則
漫石騰空作珠簾狀而勢甚雄南則嵌槽倒隙爲懸鬚形而

勢甚束皆高二丈餘兩旁石皆逼削無能上也乃復上就東
岐躡磴已又分爲二一北上躡坡一南凌溪石乃先就溪凌
石其石大若萬斛之舟高泛溪石其根四面俱湍波深激獨
西北一徑懸磴而上下瞰卽珠簾所從躍出之處上眺則石
門兩崖劈雲削翠高駢逼湊真奇觀也但門以內則石崩水
湧路絕不通乃復上就北岐躡磴始猶藤箐蒙茸旣乃石崖
聳突半里路窮循崖南轉飛崖倒影上逼雙闕下臨絕壑卽
石門之根也雖猿攀鳥翥不能度而入矣久之從舊路返藥
師寺窮日之力可併至玉皇閣始憩而草記留爲明日遊
二十二日晨起候飯性嚴東火負鐙摘豆裹米令僧僕分攜

乃從寺後東向登山二里轉而南向循山腰上二里復隨峽
轉東一里從峽盡處南轉逾嶺一里路分二岐一東上者爲
花椒菴石洞道一南上者一里而逾石門之上此石門之北
崖也所登處已在門之內對瞰南崖崩削之狀門底轟沸之
形種種神旺獨所踞崖端危險不能返觀猶覺未能兩盡也
東眺門以內峽仍逼東水自東南嵌底而來其正東有山一
支巍然中懸恰對峽門而玉皇閣卽踞其上尙不能遙望得
之蓋其內木石茸密非如外峰可以一覽盡耳於是緣岡脊
東上一里南與峽別折而東北上半里幽間有頽垣遺構爲
玉峰寺廢址玉峰者萬曆初僧石光所建藥師乃其下院而

性巖卽其後嗣也其後又有一廢址曰極樂菴從其後復轉
向東南上半里再與東峽遇乃緣支峽東向行古木益深半
里支峽東盡乃南渡其上復北轉其二里而得玉皇閣閣南
向石門而遙東盡峽壁而逼初舫於朱史二道人有僧三賢
擴而大之今前樓之四壁俱頽後閣之西角將仆蓋岌岌矣
閣東有臺下臨絕壑其下有洞爲二道靜修處時二僧及僕
俱然火覓泉將爲炊余不及覓洞先從閣援石獨上蓋遙望
峽後大山上聳三峰者衆皆指爲筆架峰謂卽東南清碧溪
後主峰余前由四潭而上曾探其陽茲更欲一窮其陰以盡
石門澗水之源竟不暇招同行者而同行僧僕亦不能從余

遂賈勇直前二里山石既窮而上峰峻甚乃攀樹三里山樹亦盡漸陟其頂層纍而上登一頂復起一頂頂皆燒茅流土無復棘翳惟頂岫間時叢木一區棘翳隨之余從嶺脊燒痕處行虎跡齒齒印沙土間連上數頂始造其極則猶然外峰也始知蒼山前後共峰兩重峙者爲正峯而形如筆架者最高西環者南從筆架北從三塔後正峰分支西夾臂合而前湊爲石門但其中俱崩崖墜派不復開洋俱下盤夾箐水嵌其底木叢其上余從峯頭東瞰筆架山之下有水懸搗澗底其聲沸騰其形天矯而上下俱爲叢木遙矚不能得其全此卽石門之源矣又從外嶺北行見其北又分支西下卽漾

灑驛北之嶺西盡於漾灑橋者也時日色正午開霽特甚北瞻則鳳羽之西有橫山一抹自西北斜亘而來者向從沙溪南望斜亘其西南爲橋後水口者也劍川之路溯之北入南眺則潭子鋪西之山南截漾灑二水之口爲合江鋪者大理之路隨之北來西覽則橫嶺鋪之脊排闥西界北接斜亘之嶺南隨合江西下永昌之路逾之西向惟東面內峰巖業榆城卽在東麓而間隔莫逾一以峯高崖陡攀躋旣難一以山割兩重中箐深陷降陟不易聞此山北岫中有大堡白雲寺可躋內峰絕頂又南逾筆架乃東下清碧溪大堡之路當卽從分支西下之嶺循度脊而上無此中壅之箐沐西平征大

理出黠蒼後立旗幟以亂之卽由此道上也憑眺久之乃循
舊跡下三里忽悞而墜西北支路絕崖欹無從懸墜且空山
杳隔莫辨真形竟不知玉皇閣所倚之支在南在北也疑尙
瀕南澗箐中而澗中多岐且峻崖絕坂橫度更難有棘則蒙
翳無棘則流圮方徘徊間雨復乘之忽聞南箐中有呼噪聲
知玉皇閣在其下余亦漫呼之已遙相應而尙隔一箐樹叢
不可見路絕不可行盤箐之上腋二里始得石崖於是攀隙
墜空始無流墜之恐而雨傾如注又一里而出玉皇閣之右
炊飯已寒重沸湯而食之閣左少下懸崖之間有洞南向
臨深澗乃兩巨石合掌而成者洞高一丈下闊丈五而上合

尖其深入約及數丈而底甚平其石質粗糲洞形亦無曲折
之致取其通明而已洞前石崖上下危削古木倒盤霏煙攬
翠俯掬轟流令人有杳然別天之想時雨已復霽由舊路轉
北而下三里至玉峰寺舊址由岐下北壑轉峽度塢一里餘
而得花椒菴石洞洞亦巨石所覆其下半疊石盤半度空中
空處浮出二三丈上下亦離丈餘而平皆如砥惟北粘下盤
之上而東西南三面俱虛簷如浮舫今以碎石隨其簷而窒
之祇留門西向而置佛於中其前架樓三楹而反無壁若以
窒洞者窒樓則洞與樓兩全其勝矣其北又一巨石隆起下
有泉出其隙間若爲之供者此地境幽塢繞水石錯落亦棲

真之地龕中器用皆備而寂無居人戶亦設而不關余愧行脚不能留此爲悵然而去乃西向平下一里卽石門北頂北來之道向所由上者又北六里而返藥師途中遇一老人負桶數枚下山卽石洞所棲之人每日登山箍桶晚負下山鬻以爲食亦不能夜宿洞間也

二十三日晨起爲性嚴作玉皇閣募緣疏因出紙請書余書而後朝食山雨忽作因停屐待之近午雨少殺余換草履性嚴披氈送之出藥師殿門卽北行二里涉一枯澗其澗自東北山麓出下嵌甚深蒼山之後至此又西北一里矣旣渡西北上西紆之坡一里逾其上始見其西開一東西塢漾濞之

水從其中東注之西向平下共二里山南有數十家當大路是爲漾濞驛別送僧西行溪北田塍中三里餘北界山環而稍南扼水直逼南山下是爲磯頭邨亦有數十家當磯之腋路南向盤之遂躡磯嘴而西半里雨止路轉北復開南北塢於是倚東山西麓北行三里餘抵漾濞街居廬夾街臨水甚盛有鐵鎖橋在街北上流一里而木架長橋卽當街西跨下流皆度漾濞之水而木橋小路較近按志劍川水爲漾洱海水爲濞二水合流故名今此橋去合江鋪北三十里驛去其北亦十五里止當漾水與濞水無涉何以兼而名之耶豈濞水非洱海卽點蒼後出之別流耶然余按水出麗江府南者

皆謂之漾如漾其發源於十和之中海經七和下崔慶合東
西諸泉而入穴故曰漾共此水發源於九和經劍川別而南
流故曰漾別則別乃分別之別非口鼻之鼻也然一統志又
稱為漾備此又與勝備同名亦非鼻字之一徵矣余乃就木
橋東買蔬米即由此度不及北向鐵橋度其中始覺湯湯倍
於洱水西向又有一峽自西來是為永平道望大塢北去亦
數里而分為二而永昌大道則從此而西始行塢中二里漸
上又二里有數家夾道大坊跨之曰綉嶺連雲言登嶺之始
也是為白木鋪由是循南坡西向上二里由坡間轉向南一
里餘復轉向西於是迴眺東之點蒼東北之鳳羽反愈近然

所臨之峽則在南更西躡坡迤邐而上又四里有寺東向當
坡嘴中懸是為捨茶寺就而飯由其後又西上路稍平其南
臨東出之澗猶故也又二里有邨當嶺脊是為橫嶺鋪鋪之
西遂西躡夾坑中又上三里而透嶺岫之脊其岫夾隘如門
透其西即有坑北墜又有坑西流路隨西流者下二里路轉
向南峽而水乃由北峽去始知猶北流而東入漾潄上流者
又南二里其峽中平而水忽分南北始知其脈由此峽中自
西而東度其上所逾夾隘乃既南而北突之峰非南來之脊
也蓋此脊西北自羅均山分支東南至此降度峽底乃東突
崇峰由其北而東下者為橫嶺而東盡於白木鋪由其南透

迤南去者東挾碧溪江西挾勝備水而盡於兩水交會處是其脉亦不甚長也從峽中南行半里轉西有小水自東南墜峽來始成流西去又一里隨流南轉始循水東崖下既渡其西復涉其東四里餘有水自東峽出西與南下之澗合其流始大而峽愈逼東崖直瞰水而西路乃渡而循西崖下南出隘已昏黑稍上坡共二里有一二家倚西坡上投宿不得又南兩崖愈湊三里及之復渡溪東則數家倚東崖下是為太平鋪乃宿其敞樓按志是水為九渡河沿山遶流上跨九橋者是其下流與雙橋河合於黃連堡東南

入勝備江

二十四日雞鳴具飯味爽即行越澗傍西山而南其峽仍逼

五里遵西山之崖漸上五里盤其南突之嘴遂挾北峯西行路轉於上溪轉於下又西十里有邨倚北山坡峽間廬舍最盛是為打牛坪相傳諸葛丞相過此值立春打牛以示民者也又遵北坡隨峽流西下十里有山橫截其西乃稍降而逼其下忽見有溪自北而南激橫截山之東麓太平鋪九渡河自東注之有數家當其交會之峽是為勝備邨此北來之水即勝備江也盤邨坡溯江而北半里乃涉亭橋渡江西崖江流差大於洱水而不及漾濞其源發於羅武山下流達於蒙化入溪碧江由其西轉而隨流南下循西山下麓行崖峭甚半里又隔江與勝備邨對又南一里餘有小峽自西來截之

漸南上盤其東突之坡其七里又上而盤其南突之嘴水從其下西轉南折而破峽去路從其上挾北坡西下蓋其西有峽自西峽下墜而來又有山從峽南挾之俱東當突嘴之下與勝備合而破其南峽突嘴之路不能趨峽而度其南挾之東垂故西折一里餘而下循其西峽又東折一里而上盤其東垂東垂卽勝備所破峽之西崖也半里轉其南又有一小水自東垂南西峽來入乃捨其南去大流而溯其西來小流循東垂南崖西向入之一里餘有邨踞小流之北坡夾路成聚是爲黃渾堡始知此小流卽雙橋河也飯於其處山雨驟至稍待復行漸轉西北行岡上二里其下峽直自北來乃下

渡峽中小橋而西此橋卽雙橋之一也其河源尙在北塢中從橋西卽躡西坡而上二里稍平西向塢倚南峰復上坡二里西逾岡脊是爲觀音山脊南北俱有寺南峰當脊而起其巔頗聳有閣罩其上以遠不及登拂脊間碑讀之言昔武侯過此方覓道聞犬吠聲而左右報觀音現故俗又呼爲娘娘叫狗山卽郡志所謂寶藏山也從脊西遙望其南壑礫沓而下高山無與爲匹者當遙通阿祿司新牛街之境也其西壑亦雜沓而來其外遠山自北亘脊南去北支分而東向逶迤與此山屬南抱爲壑頗寬豁而坡陀層伏不成平塢西山亘脊之半有寺中懸縹渺雲嵐間卽所謂萬松仙景也於是從

嶺頭盤旋西北二里轉過西下之峽由其北乃陟西來之脊其脊南北俱有峽路從其中共二里西向稍下樹木深翳再下再過脊又八里有數十家倚北坡夾道而廬是為白土鋪又西入峽七里漸上漸逼西山山脊東垂南北墜壑甚深松翳愈密上下虧蔽有哨房在坡間曰松坡民哨而無居人此處松株獨茂灑山蔽谷更無他木開其地茯苓甚多鮮食如山藥坡名以松宜也其脊蓋自西嶺分支東度觀音山者第不知南北之水何下耳於是西上躡磴甚峻數十盤而登共五里有寺踞東懸之脊東向憑臨於松雲翠濤之間是為萬松仙景寺後有閣曰松梵朱按君泰楨所題登之東眺甚豁蒼山雪色與松

壑濤聲遠近交映也由其後再曲折上躡二里餘登嶺頭又一里餘西過一脊以為絕頂矣頂脊南北分墜之峽似猶東出者又西上一里躡南突之巔榜曰日升天頂又西一里穿峽而入有數家散處峽窪間俱以木皮為屋木枝為壁是為天頂鋪先是土人俱稱為天井余以為在深壑中而不意反在萬山絕頂也問所謂井者亦竟無有嶺頭之廬以非常站所歇強之後可既止風雨交作寒氣逼人且無從市米得麵為巴而啖之卧

二十五日昧爽啖所存巴平明即行霧蔽山頂茫無可見西向稍下一里山峰簇立成窪窪中有小路北去有小水南流

大道隨之南行峽中一里折而隨峽西下峽南已墜壑盤空
 窈然西出矣西下三里餘有哨房當坡而西向亦虛而無人
 其北又有一峽自東下與南峽會於坡前路盤坡而北渡坡
 北澗卽隨北澗西下共四里餘過梅花哨於是南北兩界山
 漸開循北山又西四里度西垂之脊始全見其南北兩崖下
 墜之坑盤壑西出而西有巨壑焉沿支西下又八里抵西麓
 有寺當路北渡峽中小水從其西轉西北行田塍中二里有
 一塘積水東坡下挾其西而北又三里抵永平縣之東街其
 處東西兩界山相距八里北卽其廻環之堦南爲其夾門之
 峽相距一十五里而銀龍江界其中

其水發源上甸里阿荒山一名太平河每歲孟

冬近曉有白氣橫江恍若銀龍故名下流經打坪諸寨入瀾滄江

當縣治東有橋跨其上其

處卽爲市而無城其北有城堞略具乃守禦所而縣不在其
 中也銀龍橋之西又有橋名普濟橋下小水東南入銀龍江
 大道由縣治西沿西北而南至石洞邨西西南入山余欲從
 石洞浴溫泉當不沿西山而由中塢蓋溫泉當塢而出也乃
 從銀龍橋市蔬米卽從橋東小路隨江而渡其下流由稅司
 前西行過一小澗卽隨之南行塢中與大道之在西坡者相
 望而南也八里則溫泉當平疇之中前門後閣西廂爲官房
 東廂則浴池在焉池二方各爲一舍南男北女門有賣漿者
 不比他池在荒野也乃就其前買豌豆羹豆炊飯余先酌而

入浴其湯不熱而溫不停而流不深而淺可卧浴也舍乃一
叅戎所構而成者然求所謂石洞則無有矣既浴飯而出眺
由其西向入峽不二里卽花橋大道由其南向逾嶺爲爐塘
道余時聞有清浮寶臺山在爐塘之西西山花橋抵沙木河
大道入其路迂南由爐塘間道行其路捷余乃卽從塢中南
向行二里餘抵南山之麓有水自西峽來東注而入銀龍江
峽口卽花橋之水也度橋而南半里有寺倚南山而北向曰
清真寺同所造由其前東轉半里爲後屯有小塢自南來又東
截塢半里逾橋上坡東南躋一里餘轉而東陟其嶺一里從
嶺上悞折而南二里逾山南下路絕二里由坑西轉又二里

復轉而北仍出後屯小塢乃復上東坡二里仍過嶺上悞處
乃竟嶺峽而東半里有峽直東者爲銅礦廠道東南逾岡
者爲門檻爐塘道乃折而從東南稍上逾岡半里東向隨峽
而下者三里及峽底則深峽自北而南銀龍江搗壑而隨之
路隨其西岸南行谿崖間幽深窈窕水木陰闕一奇境也雷
雨大作行雨中十里而雨止有小溪自西峽來架木橋渡之
依南山東轉二里轉而南一里有數家踞西山之半東向臨
江是爲門檻邨下跨江之橋爲門檻橋言江流至此破峽搗
空若門闕之當其前也宿於邨家買米甚艱祇得半升以存
米爲粥留所買者爲明日飯

二十六日雞再鳴具飯平明隨江西岸行四里餘南至岔路有溪自西峽來東與銀龍江合數十家下縮溪口乃下涉其溪緣南山之北於是江東折於下路東東於上東向上者一里餘盤北突之坡而東於是江南折於下路亦南折於上南折處又有峽自東來入正與東折之江對或以爲永平之界今僅止此其南折之峽已屬順甯矣循江西嶺南向漸下四里稍折西南下緣江岸已復南折二里餘出峽峽乃稍開始見田墜有兩三家倚西坡是爲稻場山行至是始有稻畦故以爲名其江之東南坡間亦有居廬其下亦環畦墜亦稻場之屬江流其間直南去與瀾滄滄江合路西坡邨右卽西南

緣坡上一里至嶺頭正隔江與東坡之廬對於是緣峽西入遂與江別其峽自西脊東下循北崖平坡入之四里降度峽南循南崖懸躋而上乃西南盤折二里餘逾北突之岡循南坡而西二里有坑北下橫陟之又西二里乃凌其東南度脊此脊之東水下稻場南峽中西南水下爐塘而南從脊上卽西望崇山高穹上聳圓頂者爲寶臺山其北崖複突而平墜者爲登山間道其南垂紆繞而拖峽者爲爐塘所依余初擬從間道行至是屢詢樵牧皆言間道稍捷而多岐中無行人莫可詢問不若從爐塘道稍迂而路闢以炭駝相接不乏行人也其岐卽從脊間分脊西近峽南下其中居廬甚殷是爲

舊爐塘由其北度峽上卽間道也由其東隨峽南下爐塘道也余乃南坡下一里至峽底半里度東橋隨澗西岸南行其澗甚狹中止通水道一縷兩旁時環畦如栝椹四里稍上陟西崖而下半里始有一旁峽自西北來南涉之又沿西崖漸上五里盤西崖而逾其南嘴乃見西峽甚深峽底爐煙板屋擾擾於內東南嵌於峽口者下厰西北綴於峽岫者上厰也緣峽口之外南向隨流下者往順甯之大道也余從嶺上西轉見左崖有竅卑口豎喉其墜深黑卽挖礦之舊穴也從其上西行二里越上厰抵上厰而坑又中間之分兩岐來一自東北一自西北而爐舍踞其中

所出皆紅銅客商來販者四集肆多賣漿市

肉者余以將登寶臺仍齋食於肆由西峽溯流入一里居廬乃盡隨峽北轉峽甚深仄而止通一水得無他迷然山雨傾注如納大麓不免淋漓三里漸上又二里上愈峻見路有挑大根如三斗盎者以杖貫其中執而問之曰芭蕉根也以餉猪峻上二里果見芭蕉蔽崖有握而偃者卽挖根處也其處樹箐深窅山高路僻幸有炭駝俱從此赴厰爲指迷又上二里乃登其脊有路自東北徑脊而來者乃隨脊向西南去從之行脊上二里乃西南下見路左有峽西北出路遂分爲兩岐而所望寶臺圓頂似在西南隔峰乃悞下從峽西南一里餘渡峽中支澗緣之西北轉一里盤北突之嘴復西南入峽中溯

澗二里路漸煙見澗北有燒山者遙呼而問之始知爲悞然不知山在何所路當何從惟聞隨水一語卽奉爲指南東復北還盤嘴處澗乃北轉遂緣坡北向下二里有一岐自東南來合卽前分岐西北之正道也蓋寶臺正在西南所悞之峽其南卽度脊之自東西突者此寶臺東隅之來脉也而其路未開皆深崖峭壑爲燒炭之窟以供爐塘所用峽中之流從其西北向流遶北崖而西出至西北隅始與竹瀝砦南來之路合故登山之道必自西北向東南而其東不能竟達也循東崖又北一里復隨澗西轉循北崖西行二里始望見前峽稍開有邨聚倚南山之坡乃西下一里度澗橋緣其南崖西

上又一里餘而抵其邨是爲阿牯寨乃寶臺門戶也由寨後南向登山三里志慧光寺其寺西向前臨一峽隔峽又有山環之而北而絡不見寶臺蓋寶臺之頂高穹於此寺東南而其正寺又在臺頂之南尙當從西南峽中盤入也寶臺大寺爲立禪師所建三年前立師東遊請藏久離此山余至省卽聞此山之盛比自元謀至姚安途中乃聞其燼於火又聞其再建再燬余以爲被災久矣至是始知其災於臘月也計其時余已過姚安矣不知何以傳聞之在先也自大寺災後名流多棲托慧光余至日猶下午僧固留遂止寺中

二十七日飯於慧光寺卽南上五里登其西度之峽此峽乃

寶臺之四支下而度此者其岫西餘支卽北轉而環於慧光之前逾岫南見南山前矗與岫東橫亘之頂排闥兩重復成東西深峽南山之高與北頂並皆自東而西夾重峽於中而下不見底距瀾滄於外而南爲之塹蓋南山自爐塘西南轉而西向瀾瀾滄北岸而西行爲寶臺南郭於是西距瀾滄之水東包沙木河之流渡江坡頂而北盡於沙木河入瀾滄處此南山外郭之形也寶臺自爐塘西南亦轉而西向大脊中懸南面與南山對夾而爲寶臺西面與西度北轉之支對夾而爲慧光此寶臺中踞之勢也其內水兩重皆西轉而北出此外大水逆兜獨南流而東遶此諸流包絡之分也至是始

得其真面目其山如環鉤其水如交臂山脈自羅均爲鉤之根把博南丁當關爲鉤幹之中正外與鉤端相對而江坡頂卽鉤端將盡處寶臺山乃鉤曲之轉折處也瀾滄江來自雲龍州爲右臂東南抱而循山之外麓抵山東垂盡處而後去沙木河源從南山東峽爲左臂西北抱而循山之內塢抵山西垂盡處而後出兩水一內一外一去一來一順一逆環於山麓而山之南支又中界之自北自南自東自西復自南而北爲寶臺之護此又山水交滌之概也從岫南於是東轉下臨南峽上倚北崖東向行山脊之南兩降兩上三里東至萬佛堂此卽大寺之前院也踞寶臺南突之端其門西向而堂

陞俱南闕前臨深峽之南則南山如屏高穹如面牆其上多木蓮花樹極高大花開如蓮有黃白藍紫諸色瓣凡二十片每二月則未葉而花三月則花落而葉生矣絕頂有湧石塔高二丈云自地涌出乃石笋也其南峒間又有一陝西老僧結茅二十年其地當南山與阻曾無至者自萬佛堂望之平眺可達而下陟深峽上躋層崖竟日而後能往返焉由萬佛堂後北上不半里卽大寺故址寺剏於崇正初元其先亦叢蔽之區立禪師尋山見之爲焚兩指募開叢林規模宏敞正殿亦南向八角層甍高十餘丈址盤數畝其脉自東北圓穹之頂層跌而下狀若連珠而殿緊倚之第其前橫深峽既不

開洋而殿址已崇西支下伏右乏夔砂水復從泄覺地雖幽闕而實鮮關鎖此其所未盡善者或謂病在前山崇逼余謂不然山外大江雖來繞而無此障之則曠山內深峽雖近環而無此夾之則泄雖前壓如面牆而宇內大刹如少林之面少室靈巖之面岱宗皆突兀當前而開拓彌遠此吾所謂病不在前之太逼而在右之少疎也初余自慧光寺來其僧翠峯謂余曰僧少待一同衣當卽追隨後塵比至萬佛堂翠峯果同一僧至乃川僧一葦自京師參訪至此能講演宗旨聞此有了凡師亦川僧淹貫內典自立師行後住靜東峽爲此山名宿故同翠峯來訪之時了凡因殿燬募閃太史約菴先

鑄銅佛於舊基以爲興復之倡暫從靜室中移棲萬佛前樓
余遂與一葦同謁之了凡卽曳杖前引至大寺基觀所模佛
胎遂從基左循北崖復東向行盤磴陟坡路極幽峭兩過小
靜室兩升降南下小峽深木古柯藤交竹叢五里而得了凡
靜室室南向與大殿基東西並列第此處東入已深其前南
山並夾如故而右砂層疊不比大殿基之西曠矣其脈自直
北圓穹之頂中垂而下至室前稍幽前復小起圓阜下臨深
峽之北而室則正臨其坳處橫結三楹幽敞兩備此寶臺奧
境也一葦與了凡以同鄉故欲住靜山中了凡與之爲禪語
余旁參之覺凡公禪學宏貫而心境未融葦公參悟精勤而

宗旨未徹然山窮水盡中亦不易得也了凡命其徒具齋始
進麵餅繼設蔬飯飯後雨大至半晌方止下午乃行仍過寺
基其十五里還宿慧光寺

二十八日平明飯而行三里北下至阿牯寨由其西下又二
里越東來澗緣北山之南崖西北上一里餘盤其西垂而北
其下卽阿牯北西二澗合而北流之峽也二里越西突之坡
仍循東坡西北行六里墜懸坡而下一里及澗仍隨澗東岸
北行望見峽北有山橫亘於前路直望之而趨五里有一二
家倚東山下其前始傍水爲田又北二里直抵北山下有峽
自東而西中有一水沿北山而西注此卽舊爐塘西來之道

阿牯寨之澗南來此與之合是爲三泖溪舊爐塘指答者謂問道捷而難詢正指此也於是其峽轉爲東西夾水合而西去路北涉之循北崖西行三里西降而出峽口其西乃開南北大峽蓋南自寶臺南峽來從南山北轉而界瀾滄於外者爲此塢西山從西峒北轉而挾慧光寺於內者爲此塢東山東山爲三泖溪西出而界斷寶臺中脉止至其北又舊爐塘北脊之支分派西突與西山對峽而北峽中塢大開陂陀襍沓底不甚平南峽與三泖溪水合流北去是爲沙木河上流峽中田塍高下盤錯居廬東西對峙是名竹瀝砦路挾東山北轉行東邨之上而北三里塢中水直齧東山之麓路緣崖

躡其上又北二里逾馬鞍嶺此嶺乃東山西突之嘴水曲而西環其麓路直而北逾其峒此竹瀝砦之門戶也北下二里始爲平川水與路俱去險就夷北行溪東三里有邨倚東山下曰狗街子倚西山曰阿夷邨東山乃博南大脊西盤西山乃寶臺南山北轉者也其山平展而北又四里而沙木河驛之西坡自丁當關西突於川之北與西界山湊川中水自沙潭亦逼西山之麓而北路乃涉水緣西崖之上行又三里北下及溪有橋跨溪東來者是爲沙木河驛大道其橋有亭上覆曰鳳鳴橋余南來路經橋西不逾橋也飯於橋西隨西山大路北行三里盤西山北突之嘴於是北塢稍開田塍交布

其下溪流貫直北去透北峽入瀾滄路盤嘴西行又一里爲灣子邨數家倚南山北麓當北突之腋故曰灣子由其西循峽南入一里峽窮復遵峽西之山曲折西向上躋三里陟嶺脊此卽寶臺南山北轉至此者踞嶺東望東界卽博南山所從南環而至者北望峽口中伏卽沙木河北注瀾滄而此支所北盡於此者其外有崇峰另起橫峙於五十里外者曰瓦窰山爲永平北與雲龍州分界昔王磐踞而爲亂處按騰永圖說崇正戊辰王磐據險爲叛燒斷瀾滄橋又按馬元康會領兵追搗王磐何某巢穴於曹澗馬亦言先是王何構叛來襲攻永昌幸從瀾滄燒橋而來故得爲備按曹澗在雲龍州西界瓦窰山在雲龍州南界曹澗當永昌北鄙王何二賊不直南下而東由瀾滄橋固欲截其東援大路亦以與瓦窰相近也蓋瓦窰曹澗皆二賊之窟矣西望則重崖層

峽其下逼簇不知瀾滄之流已嵌其底也由脊而南有菴橫跨岫中題曰普濟菴有僧施茶於此是卽所謂江坡頂也出其南西瞰峽底濁流一綫遶東南而去下嵌甚深隔流危崖舉嶽上截雲嵐而下鑿江流者卽羅岷山也瀾滄江自吐蕃嵯和哥旬南流經麗江蘭州之西大理雲龍州之東至此山下又東南經順甯雲州之東南下威遠車里爲撓龍江入交趾至海一統志謂趙州白厓驗禮社江至楚雄定邊縣合瀾滄入元江府爲元江余按瀾滄至定邊縣西所合者乃蒙化漾濞陽江二水非禮社也禮社至定邊縣東所合者乃楚雄馬龍祿豐二水非瀾滄也然則瀾滄禮社雖同經定邊已有

東西之分同下至景東東西鄙分流愈遠李中谿著大理志定瀾滄爲黑水另具圖說於順甯以下卽不能詳今按鐵鎖橋東有碑亦鄉紳所著止云自順甯車里入南海其未嘗東入元江可知也由嶺南行一里卽曲折下其勢甚陡迴望鐵橋嵌北崖下甚近而或迎之或背之爲之字下者三里而及江岸卽挨東崖下溯江北行又一里而至鐵鎖橋之東先臨流設關鞏石爲門內倚東崖建武侯祠及稅局橋之西鞏關亦如之內倚西崖建樓臺并祀創橋者鞏關俱在橋南其北皆崖石巉削無路可援蓋東西兩界山在橋北者皆夾石倒壓江面在橋南者皆削土駢立江旁故取道俱南就土崖作

之字上下而橋則架於其北土石相接處其橋闕於北盤江上鐵鎖橋而長則殺之橋下流皆渾濁但北盤有奔沸之形澎湃之勢似淺此則渾然逝淵然寂其深莫測不可以其狹東而與北盤共擬也北盤橫經之練俱在板下此則下既有承上復高縹兩崖中架兩端之楹間至橋中又斜墜而下縹之交絡如機之織綜之提焉此橋始於武侯南征故首祀之然其時猶架木以渡而後有用竹索用鐵柱維舟者柱猶尙存或以爲胡敬德或以爲國初鎮撫華岳而胡未之至華爲是然蘭津之歌漢明帝時已著聞而不始於武侯也萬曆丙午順甯土酋猛廷瑞叛阻兵燒燬崇正戊辰雲龍叛賊王盤又燒燬四十年間二次被燬

今已已復建委千戶一員守衛固知迤西咽喉千百載不能
 改也余時過橋急不及入叩橋東武侯祠猶登橋西臺間之
 閣以西崖尤峻為羅岷之麓也於是出鞏關循羅岷之崖南
 向隨江而上按志羅岷山高十餘丈蒙氏時有僧自天竺來
 名羅岷嘗作戲舞山石亦隨而舞後沒於此人
 立祠巖下時墜飛石過者驚趨名曰催行石按石本崖上野
 獸拋踏而下昔有人於將曉時過此見霧影中石自江飛上
 甚多此又一異也五里至平坡鋪數十家夾羅岷東麓而居下臨瀾
 滄其處所上猶平故止平坡名從此則躡峻矣時日色尚可
 行而負僧苦於前遂止按永昌重時魚其魚似鯖魚狀而甚
 肥出此江亦出此時謂之時者惟三
 月盡四月初一時耳然
 是時江漲後已不能得

二十九日雞再鳴具滄平明行即曲折南上二里餘轉而西

其山復土盡而石於是滄江東南從大峽去路隨小峽西向
 入西一里石崖矗夾有水自夾中墜先從左崖棧木橫空度
 即北向疊磴夾縫間或西或北曲折上躋甚峻兩崖夾石如
 劈中垂一窰水搗石而下磴倚壁而上人若破壁捫天水若
 爭道躍穎兩不相遜者夾中古木參霄虬枝懸磴水聲石色
 冷人心骨不復知有攀陟之苦亦不知為驅馳之道也上二
 里有菴夾道有道者居之即所謂山達關也由其後又西上
 路分爲二一渡水循南崖一直上循北崖共一里餘而合遂
 凌石峽上余以為山脊矣其內猶然平峽水淙淙由峽中來
 至是墜峽石東下其外甚峻其內甚平登其峻處回望東山

之上露出層峰直東而近者乃狗街子沙木河驛後諸脊所謂博南丁當也東南而遠者寶臺圓穹之頂也內平處亦有兩三家當峽而居循之西入塢底成畦路隨澗北二里涉澗而南盤南峰之腋而西一里透峽西出則其內平窪平圍下墜如城四山迴合於其上底圓整如鏡得良疇數千畝邨廬錯落雞犬桑麻俱有靈氣不意危崖絕磴之上芙蓉蒂裏又現此世界也是爲水寨先是聞其名余以爲將越山而下至是而知平窪中環山頂之水交注窪中惟山達關一線墜空爲水口武陵桃源王官盤谷皆所不及矣此當爲入滇第一勝以在路旁人反不覺也循窪東稍南上有廬夾道是爲水

寨鋪按志有阿章寨豈卽此耶又南寨隨坡東行二里逾一東坡之脊脊兩旁有兩三家脊南水猶東南下瀾滄仍非大脊也過脊南東南二面山皆下伏於是東望寶臺知瀾滄挾其南去南瞻瀾滄西岸羣峰襍沓以下缺

自此至四月初九共缺十日當是在永昌府晤因人望

儼乙丑度吉士與徐石并其弟知愿名仲侗丙子解元時

裔孫 熙海南校字

遊記第八册上終

Blank page with faint bleed-through text from the reverse side.

遊記第八冊下

江陰徐宏祖霞客著

子

寄介立

輯

季夢良會明編

後學金

安步雲

重校

同邑

楊名時凝齋閱

族孫徐

鎮筠峪

滇遊日記九

己卯四月初十日閃知愿早令徐使來問夫而昨所定者竟不
至徐復趨南關覓一夫來余飯已久矣乃以衣四件書四本
并襪包等寄陶道遂同至夫寓候其飯上午乃行徐使始去
出南門門外有小水自西而東弔橋跨其上卽太保山南峽
所出者南行五里有巨石梁跨深溪上其下水斷而成流

想卽沙河之水也又南半里坡間樹色依然頗似余鄉櫻珠而不見火齊映樹一一家結縵樹下油碧輿五六肩乃婦人之遊於林間者不能近辨其爲何樹也又南半里有堤如城垣自西山環遶來登其上則堤內堰水成塘西浸山麓東築堰高丈餘隨東堰西南行二里堰盡山從堰西南環而下有數家當曲中南轉行其前又二里有數十家倚西山下山復環其南是爲卧獅窩蓋其西大山將南盡支乃東轉其北先有近支東向屢下如太保九隆皆是也又南爲卧獅在西南岫中山形再跌而下其上峰石崖盤突儼然一狻猊之首其下峰頗長則卧形也余先望見大路在南坡之上初不知小

路之西折而當獅崖盤突間但遙見其崖突兀與前峰湊峽甚促心異之候土人而問初一人曰此石花洞也再問一人曰此芭蕉洞也小路正從其下過石花卽其後來之名耳蓋大路上南坡而小路西折而由此余時欲從小路上而僕擔俱在後坐待久之俟其至從邨南過小橋有碑稱卧佛橋過橋卽西折從小路上坡一里餘從坡岫間渡小水卽仰見芭蕉洞在突崖之下蓋突崖乃獅首而洞則當其卧臍之間涉澗又西上而探洞洞門東向高穹二丈正與筆架山遙對洞內丈餘卽西北折而下其洞下雖峻而路頗夷下三丈漸暗聞秉炬入深里餘姑俟歸途攜炬以窮也出洞循崖西上一

里過突崖下峽透脊而西半里度一窪脊以內乃中窪之峽水東挨突崖脊下搗其崖麓無穴以洩水沫淤濁然前所渡芭蕉洞前小水卽其透崖瀝峽而出者從水上循嶺南轉一里逾南坡之脊始見脊南亦下墜成大窪而中無水南坡大道從右窪中西南上而余所從小道則循西大山南行嶺間五里連逾二坡脊共二里則西界大山南向墜爲低脊此其東轉之最長者也南坡涉窪之路至此而合乃其轉西向循低脊而進脊北亦中窪瀦水焉西一里降而下坡半里而得窪底舖五六家在坑峽間其峽雖縱橫而實中窪中無滴水隨窪西下一里直抵大山下復南行窪峽中二里又得東墜

之脊脊南塢稍開於是小圓峰離立矣然其水猶東行一里又南上坡盤坡南離立圓峰取道峯隙而南一里轉峰腋始東南上盤而西南共里餘則南北兩支俱自北大山之西分支東遶中夾成峽甚深路逾北支從其上西向入峽其南支則木叢其上箐墜其下雖甚深而不聞水聲焉西行二里乃西下箐中又一里有數家當箐底是爲冷水箐乃飯於嚮腐者家於是西南隨箐上一里過一脊其脊乃從西而東度之脈也脊南始見羣山俱伏有遠山橫其西南路又逾岡西上一里登其南突之崖是爲油革關舊址乃舊之設關而榷稅處今已無之其西卽墜崖西下甚峻下二里漸平又二里西

峽漸開有僧新結樓倚北山下施茶曰孔雀寺由寺西循山
嘴南轉共一里逾嘴而西乃西北盤其餘支三里而得一亭
橋橋跨兩峽間下有小澗自北而南已中涸無滴橋西逾坡
西北下路旁多黃果卽覆盆子也色黃酸甘可以解渴其西
塢大開塢西大山一橫於西一橫於南而蒲縹之邨當西大
山下其山南自南橫大山又東自油革關南下之支橫度爲
低脊而復起者其中水反自南而北抵羅岷而西入潞江焉
共西下二里乃得引水之塍其中俱已插秧遍綠又西北行
二里餘過蒲縹之東邨邨之西有亭橋跨北注之溪曰吳氏
輿梁又西半里宿於蒲縹之西邨其地米價頗賤二十文可

飽三四人蒲縹東西邨俱夾道成街而西邨更長有驛在焉
十一日鷄鳴起具飯味爽從邨西卽北向循西大山行隨溪
而北漸高而陟崖共八里爲石子甬有數家倚西山之東北
隅又北二里乃盤山西轉有峽自西而東合於枯飄北注之
峽溯之依南山之北西入二里下陟南來峽口峽中所種俱
紅花成畦已可採矣西一里陟西來峽口其上不多水亦無
幾有十餘家當峽而居是爲落馬斲度峽北復依北山之南
西入一里平上逾脊其脊自南而北度起爲峽北之山而北
盡於羅岷者也逾脊西行峽中甚平路南漸有澗形依南崖
西下路行其北三里數家倚北山而居有公館在焉是爲大

坂鋪從其西下陟一里有亭橋跨澗於是涉澗南依南山之北西下二里有數家當南峽是爲灣子橋有賣漿者連糟而啜之卽余地之酒釀也山至是環聳襍沓一澗自東來者卽大坂之水一澗自南峽來者墜峽倒崖勢甚逼仄北下與東來之澗合而北去小木橋橫架其上度橋卽依西山之東北行東山至是亦有水從北峽西下三水合而北向破峽去東西兩崖夾成一線俱摩雲夾日溪嵌於下蒙箐沸石路緣於上鑿壁披崖排石齒而北三里轉向西下石勢愈峻愈合又西二里峽曲而南澗亦隨峽而曲路亦隨澗而曲半里復西盤北轉路皆鑿崖棧木半里復西向緣崖行一里有碑倚南

山之崖題曰此古盤蛇谷乃諸葛武侯燒藤甲兵處然後信

此險之真冠滇南也

水寨高出衆險之上此峽深盤南漸衆壑之下滇南二絕於此乃見碑南漸

下峽亦漸開又西二里乃北轉下坡復轉而西一里有木橋橫澗而北乃度循北崖西行一里逾南突之脊於是西谷大開水盤南壑路循北山又西平下三里北山西斷路乃隨坡南轉西望坡西有峽自北而南俱崇山夾立知潞江當在其下而不能見南行二里餘則江流已從西北嵌腳下逼東山南峽之山轉而南去矣乃南向下坡一里有兩三家倚江岸而栖其前有公館焉乃就湍水以飯時渡舟在江南岸待久之乃至登舟後舟子還崖岸而飯久之不至下午始放渡而

南江流頗闊似倍於瀾滄然瀾滄淵深不測而此當肆流之衝雖急而深不及之則二江正在伯仲間也其江從北峽來按一統志云其源出雍望不知雍望是何地名據土人言出狗頭國言水漲時每有狗頭浮下也注南峽去或言東與瀾滄合或言從中直下交南故蒙氏封爲四瀆之一以余度之亦以爲獨流不合者是土人言瘴癘甚毒必飲酒乃渡夏秋不可行余正當孟夏亦但飯而不酒坐舟中擢流甚久亦烏覩所云瘴母哉渡南崖暴雨急來見崖西有樹甚巨而鬱葱如盤急趨其下樹甚異本高二丈大十圍有方石塔聳其間高與幹等幹跨而絡之西北則幹密而石不露東南臨江則幹踈而石出幹與石已連絡爲一不可解矣亦

窮崖一奇也已大風揚厲雨散復西向平行上坡望西北穹峰峻極西南駢崖東突其南崖有居廬當峰而踞卽磨盤石也望之西行十里逼西山雨陣復來已虹見東山盤蛇谷上雨遂止從來言暴雨多瘴亦未見有異也稍折而南二里有邨當山下曰八灣數家皆茅舍一行人言此地熱不可栖當上山乃涼從邨西隨山南轉一里過一峽口循峽西入南涉而逾一崖約一里遂從南崖西上其上甚峻曲折盤崖八里而上凌峰頭則所謂磨盤石也百家倚峰頭而居東臨絕壑下嵌甚深而其壑東南爲大田禾芑芑焉其夜倚峰而栖月色當空此卽高黎貢山之東峰憶諸葛武侯王威甯驥之前

後開疆方威遠政之獨戰身死往事如看鏡浮生獨倚巖慨然者久之

十二日雞再鳴飯味爽出門其處雖當峻峰之上而居廬甚盛上公館在邨北潞江驛在其上山下東南成大川已插秧盈綠潞江沿東山東南去安撫司依西南川塢而居遂由磨盤石西南上仍峻甚二里逾其南峽之上其峽下嵌甚深自西而東向出安撫司下峽底無餘隙惟聞水聲潺潺在深箐中峽深山亦甚峻藤木蒙蔽猿鼯晝號不絕北則峽北緣崖上隨峽西進上去山頂不一二里緣峽平行西四里有石洞南臨路崖深闊丈餘土人鑿石置山神碑於中又四里稍折

而北上崖旋西西登臨峽之坡北峽之上至是始南垂一坡而南峽之下則有峽自南山夾底而出與東出之峽會成丁字而北向垂坡焉又西二里或陟山脊或緣峰南又三里有數家當東行分脊間是為蒲滿哨蓋山脊至是分支東行又突起稍高其北又墜峽北下其南即安撫司後峽之上流也由此西望一尖峰當西復起其西北高脊排穹始為南渡大脊所謂靜黎貢山土人譌為高良工山蒙氏僭封為西岳者也其山又稱為崑崙岡以其高大而言然正崑崙南下正支則方言亦非無謂也由蒲滿哨西下一里抵所望尖峰即躡級數轉而上兩旁削崖夾起中墜成路路由夾崖中曲折上

升兩岸高木蟠空根斜垂崖外其上竹樹茸密覆陰排幙從其上行不復知在萬山之頂但如唐人所咏兩邊山木合終日子規啼情與境合也一里餘登其脊平行脊上又二里餘有數家倚北脊是為分水關邨西有水沿北坡南下此為潞江安撫司後峽發源處矣南轉西逾嶺脊甃砌鞏門跨度脊上其關甚古頂已中頽此即關之分水者關東水下潞江關西水下龍川江於是西下峽稍轉而南即西上穿峽逾脊其五里度南橫之脊有邨廬是為新安哨由哨南復西轉或過山脊或蹈嶺夾屢上屢下十里為太平哨於是屢下屢平始無上陟脊之五里為小歇廠五里為竹笆舖自過分水關雨陣時至至竹笆

舖始晴數家夾路成衢有賣鹿肉者余買而炙脯於是直下三里為茶菴又西下五里及山麓坡間始盤陞為田其下即龍川江自北而南水不及潞江三分之一而奔墜甚沸西崖削壁插江東則平坡環陞行陞間半里抵龍川江東岸湖江北行又半里有鐵鎖橋架江上其製兩頭懸練中穿板如織法一如瀾滄之鐵鎖橋而狹止得其半由橋西即躡級南上半里為龍關數十家當坡而居有稅司以摧負販者又西向平上四里餘而宿於橄欖坡其坡自西山之脊東向層突百家當坡而居夾路成街踞山之半其處米價甚賤每二十文宿一宵飯兩滄又有夾包 龍川江發源於羣山北峽峨昌

蠻七藏甸經此東為高黎貢西為赤土山下流至緬甸太公城合大盈江
 十三日平明而飯由坡西登嶺西北上八里稍北逾北峽西
 上二里從嶺上平行望西北有層峰排簇嶺上初以為將由
 其南垂行一里忽從嶺頭轉北三里乃西南下峽中一里有
 四五家當峽而居竹籬茅舍頗覺清幽是為赤土舖其邨當
 西面排簇層峰之麓東與橄欖坡夾而為峒邨西有亭橋架
 小澗上其水自南峽來搗北峽去橋名建安按志大盈江之
 水一出自東北赤土山而此舖名赤土水猶似東北下龍川
 者豈其西排簇層峰為赤土山而此猶其東麓之水以其在
 麓即以此名舖耶由橋西即南向上坡二里西南登脊即自排

簇峰東南分支下者又轉而西一里餘有菴施茶當脊北向
 而踞是為甘露寺又西一里坡間水北向墜崖路越之西向
 下峽峽中有水自北而南又與坡上水分南北流以余意度
 之猶俱東下龍川者半里乃從峽底溯水北入其峽東西兩
 崖俱從排簇層峰分支南下者西崖即其本支東崖乃分支
 東南由甘露寺脊而下者也第峽水南出東轉不知其北合
 於建安橋抑直東而下龍川否也北行峽底一里餘水分二
 道來皆細甚遂從坡西躡峻上一里北穿嶺夾半里透脊其
 脊自東北度西南脊以北即墜峽西下路從峽端北轉而西
 有數家倚北山之上是為亂箭哨至是始出排簇層峰嶺脊

之西按志赤土山在州城東三十里水至是始分則前之赤土鋪猶東岸之麓非分流之正脊可知也飯於嶺哨西向行稍下共二里有塢自南而北細流注其中按志大盈江有三源一出赤土山當卽此矣從此而西出馬邑河遶州城北而西合龍崑羅生二水同爲大盈之源者也又北上坡二里餘有一二家當坡之南環堵圍南峽之峭甚遙磔植果樹於中是爲板廠由其西二里又西下半里有十餘家當峽峭而居是爲芹菜塘其前小水東北與大盈之源合邨廬不多而皆有杜鵑燦爛血艷奪目若以爲家植者豈深山野人有此異趣若以爲山土所宜何他岡別隴杳然無遺也由邨西復西

上坡一里餘轉峽而平行頂上三里餘乃出西嶺之端下望其塢甚深而中平如砥良疇遠邨交映其間其塢大而圓乃四面小山環圍而成者不比他川之沿溪成峽而已西向峻下者五里循峽東北折又折而西西三里乃循東山北行其下稍平又二里有邨當東山之麓是爲坡腳邨有賣漿者出酒甚旨以醋芹爲案與同行崔姓者連啜二壺乃行於是西行平疇中一里有小水自南而北卽志所云羅生山之水亦大盈三源之一分流陞中者也又西北二里餘有村曰雷打田其東亦有小溪自南而北則羅生山之正流也與前過小流其爲大盈之一源云是溪之東田窪間土皆黑墳土人芟其

上層曝乾供爨蓋煤堅而深入土下此柔而浮出土上而色則同也由邨北又西三里有廬舍當坡塍間曰土鍋邨邨皆燒土為鍋者於是其西廬舍聯絡一里為東街又半里西交大街則十字為衢者也騰越州城之南門即當大街之北城南居市甚盛城中所無而此城又迤西所無乃稅駕於大街東黔府官舍時適過午也

時黔府委官王仰泉者已返省阮玉灣導書姑與店中

十四日早雨命顧僕覓潘秀才家投吳方生書上午雨止潘來顧下午余往顧而潘出乃返作記寓中薄暮同行崔君挾余酌於市以竹實為供

竹實大如松子肉圓如蓮肉土人煮熟以賣

投壺暢飲月上而返冰輪皎然

十五日晨往晤潘潘勸無出關上午潘饋酒餚下午店中老人亦來勸余無行先是余以阮玉灣書畀楊主人託其覓同行者主人唯唯至暮以潘酒招之共酌兄弟俱勸余毋即行謂炎瘴正毒奈何以不貲輕擲也屈指八月王君將復來且入內同之入關最便余姑諾之是夜月甚皎而邸舍不便憑眺竟鬱鬱卧

十六日晨起候主人飯欲為尖山之行其山在州城西北百里先是主人言其靈異愆患余行故謀先及之乃以竹箱衫氈寄楊主家挈輕囊與顧僕行從南門外循城西行半里過新橋巨石梁也橋下水自北合三流襟城西而南過此南流

去卽所謂大盈江矣余既過橋四望山勢迴環先按方而定之當城之正東而頂平者爲球琿山亂箭哨之來道逾其南脊當城之正西而尖聳者爲擂鼓山南爲龍光臺爲緬箐道爲水口西夾直北者爲上千峩山亂箭哨之脈從之東度南起去城北二十里直南者爲來鳳山州治之脈從之北度又西突保祿閣爲水口東夾城西南爲水口東峽極緊墜空而下爲跌水崖城東南東北俱有迴塢乃來鳳山自北環度之脈而東以獨伏有高山穹其外卽龍川江東高黎貢山北來之脈也城西北一峯獨聳高出衆峯爲龍窰山乃北來分脈之統會從此直南爲筆峯爲寶峰爲擂鼓而盡於龍光臺從

此西度南轉爲猛蚌從此東度爲上千峩低伏而東度南起爲赤土山亂箭嶺南下西轉爲羅生山支分直北者爲球琿時州東而北盡馬邑邨支分由西而南者爲來鳳時州南而西夾水口北與龍光對此州四面之山也其水一東南出羅生山北流經雷打田至城東北一東出亂箭哨北流西出馬邑村西南至城東北一出龍窰山瀆爲海子流爲高河南至城東北三水合爲一是爲大盈江由城西而南過二橋墜峽下搗其深十丈闊三丈餘下爲深潭破峽西南去經和尚屯又名大車江此州四面之水也其北二日抵界頭與上江對其南一日抵南甸與隴川緬甸對其西一日半至古勇與茶

山對其東一日半至分水關與永昌對八關自其西北斜抵
 東南西四關屬蠻哈守備自西北而東南一日神護二日萬
 仞三日巨石四日銅壁東四關屬隴把守備自西南而
 東南一日鐵壁二日虎踞三日天馬四日漢隴八關之外自
 神護而出為西路通迤西出琥珀碧玉自天馬而出為南路
 通猛密有寶井自漢隴而出為東南路通木邦出邦洋布自
 鐵壁而出亦為南路通蠻莫為緬甸阿瓦正道昔蠻莫猛密
 俱中國地自萬歷二十二年金騰威道立此又關於是關外
 諸彝俱為阿瓦所有矣 由州南抵南甸分路西向千崖至
 蠻哈諸關南向隴川至隴把諸關由州西抵緬箐分路西出
 神護通迤西西北逾嶺至古勇 大槩三宣猶屬關內而六
 慰所屬俱 遂分華彝之界此其四鄙之望也大盈江過河上
 屯合緬箐之水南入南甸為小梁河經南牙山又稱為南牙
 江西南入千崖雲籠山下名雲籠江沿至千崖北為安樂河
 折而西一百五十里為檳榔江至北蘇蠻界注金沙江入於

緬一曰合於太公城
 此城乃緬甸界按緬甸金沙江不注源流志但稱其關
 五里然言孟養之界者東至金沙江南至緬甸北至千崖則
 其江在干崖南緬甸北孟養東矣又按芒市長官司西南有
 青石山志言金沙江源出之而流入大盈江又言大車江自
 為衝流經青石山下豈大盈經青石之北金沙經青石之南
 蓋其言源出者當亦流經而非發軔若發軔豈能即此大耶
 又按芒市西有麓川江源出峩昌蠻地流過緬地合大盈江
 南甸東南一百七十里有孟乃河源出龍川江而龍川江在
 騰越東實出峩昌蠻地南流至緬太公城合大盈江是麓川
 江與龍川江同出峩昌同流南甸南千崖西同入緬地同合

大盈然二地實無二水豈麓川卽龍川龍川卽金沙一江而三名耶蓋麓川又名隴川龍與隴實相近必卽其一無疑蓋峩昌蠻之水流至騰越東爲龍川江至芒市西爲麓川江以與麓川爲界也其在司境實出清石山下以其下流爲金沙江遂指爲金沙之源而非源於山下可知又至千崖西南緬甸之北大盈江自北來合同而南流其勢始闊於是獨名金沙江而至太公城孟養之界實當其南流之西故指以爲界非孟養之東又有一金沙南流千崖之西又有一金沙出青石山西流亦非大盈江旣合金沙而入緬龍川江又入緬而合大盈大盈所入之金沙卽龍川下流龍川所合之大盈卽

其名金沙者也分而岐之名愈紊會而貫之脈自見矣此其二水所經也於是益知高黎貢之脈南下芒市木邦而盡於海潞江之獨下海西可知矣按志又有大車湖在州南甚廣中有山如瓊浪中一點青今惟城北上千峩龍窰山下有二海子城南並無瀦水豈洪流盡揚塵耶過新橋西行半里有岐西北行者爲烏沙尖山道南下者爲跌水河道余聞其勝甚乃先南趨出竹塢中一里涉一東流小澗上南坡折而東約半里有大石梁架大盈江上其橋東西跨新橋下流從橋西稍南上坂不半里其水從左峽中透空平墜而下崖深十餘丈三面環壁水分三派飛騰中闊丈五左駢崖齊涌者闊

四尺右嵌崖分趨者闊尺五蓋中如簾左如布右如柱勢極雄壯與安莊白水河齊觀但此崖更近而逼從西崖遶南崖平對而立飛沫倒捲屑玉騰珠遙洒人衣面白日間真如雨花雪片土人所稱久雨不晴者以此但雨字當易旱爲是雨雨字則疊牀架屋矣其水下墜成潭嵌流峽底甚深因下蹈之有屋兩重在夾壑中乃王氏水春也復上西崖其南一峰高聳憑空揖瀑是爲龍光臺上建關帝殿迴盼久之復下西崖其崖甚狹東卽瀑流墜空西亦夾坑環屋俯視屋下坑底有流泉疊碓亦水春也而當環坡間其西卽南下緬箐大道不知水所從出細瞰之水從腳下透穴出南分爲二一隨大

道南注一復入巨石下入夾坑之屋爲春迴眺崖北有峽一線深下五六丈駢峙北來闊僅一尺而高不啻三丈餘水從其底透入前崖之腹而出其南計崖穴之上高亦三丈餘南至出水之穴上連三四丈不識其下透之穴與上駢之峽從何而成天巧人工兩疑不能至此矣從崖上躡西峰一里有寺踞峰之東門東向爲毘盧寺由其西二里直抵播鼓尖峰下見有路直躡峰西上而路有二生指寶峰大道尙在北乃橫涉田間半里得大道隨而西上坡二里西抵播鼓之北當西北從岐上而余誤從西南一里躡峻一里漸轉南陟復向播鼓行又一里心知其誤遂西逾嶺脊則望見寶峰殿閣在

遊記 漢九
西北嶺半與此脊齊等而隔箐兩重其下甚深皆從西南嶺脊墜下計隨坡東下就大道復上與躡坡西上從峰脊轉下其路相比不若上之得以兼陟其頂也遂西南上甚峻一里直出播鼓尖之西有路自尖南向來合同之西北度脊脊北路分爲二一西北沿峰去一東北攀嶺行一里再逾嶺陟脊其脊兩旁皆東西下乃飯於脊過北路復分爲二如前然東北者猶非寶峰路尙隔一箐也乃復西北上頂一里躡其最高處東俯州城東塢西俯峩隴南塢皆近夾此脊下而峩隴之西又有高峰一重自北而南夾峩隴之塢南出緬箐而與大盈之江合而南去焉頂東南深樹密翳乃從西北下甚峻

半里就夷隨東箐北行嶺脊又半里路交十字一從南直北者俱行其脊一從東箐中上橫過西北者出山腰知寶峰之寺在箐翳矣乃折而東下木葉覆叢條間甚峻而滑非攀枝足無粘步下一里轉殿角之右則三清殿也前有虛亭三楹東攬一川之勝而其下亭閣綴懸崖間隔箐迴坡咫尺縹渺殿西廡爲二黃冠所栖余置行囊令顧僕守其處乃由亭前東下道分爲二一從右下危坡一從左轉深箐余先隨箐下半里右顧崖間一亭飛綴八角重檣高倚懸崖之上乃參府吳君蜀人名新建以祀純陽者由亭左再下緣箐半里南轉仰見亭下之石一削千仞如蓮一瓣高穹向空其南又豎一

辨駢附之皆純石無纖紋惟交附處中垂一線闊僅尺餘鑿級其中仰之直若天梯倒挂也北瓣之上大書奠高山大川五字亦吳參府筆其下新構一軒跨路貌靈官於中南瓣側有尖特聳夾級爲門其下玉皇閣倚之環騰多土山獨是崖純石危穹夾箐之間覺耳目頓異玉皇閣南亦懸箐無路靈官軒北又鑿崖爲梯嵌夾石間北下數丈有石坊當真前大書曰太極懸崖從此北度東下之箐再上北坡共里餘則寶峰寺當峰而踞高與玉皇閣等而玉皇閣東向此寺南向寺東龍砂最微固不若玉皇閣當環箐中央得一山之正也寺頗寥落有尼居之此昔之摩伽陀修道處他處皆釋鹽於道

而此獨反之已復下箐中躡太極崖過北瓣下從一線之級上其級峻甚幾不能留趾幸兩崖逼束手撐之以登一上者八十級當純陽亭之南峽始曲折爲梯又三十餘級而抵虛亭間余擬眺月於此以擴未舒之觀因拭桌作記令顧奴汲水太極下箐東以爨二黃冠止之以飯飯余仍坐虛亭忽狂飈布雲迨暮而月色全翳邵道謂虛亭風急邀余卧其榻十七日余起見日麗山幽擬暫停憩其間以囊中存米作粥令顧奴入州寓取貴州所買藍紗將鬻以供杖頭而此地離州僅八里顧奴去不返抵下午餒甚胡道飯余旣而顧奴至紗仍不攜來也

十八日錄記於虛亭先夜有虎從山下齧參戎馬參戎命軍士搜山覓虎四峰瞭視者吶聲相應兩箐搜覓者上下不一竟不得虎 巔塘關南越大山西南達古勇關北分支東突者為尖山東南突者為馬鞍山又分支南下者為寶峰又南為打鼓尖又南盡於龍光臺其馬鞍山正支東度者一起為筆峯又起為龍窰於是南環為赤土為亂箭哨過脊又南為半箇山而西北環來鳳而結州治此所謂迴龍顧祖也從古勇關北分支南下者為鬼甸西山又南為鷺籠西山又南抵於緬箐正支西南下者為古勇南關而南接於神護焉入關之外其北又有此古勇巔塘二關乃古關也

巔塘之外為茶山長官司舊屬

中國今屬阿瓦巔塘東北阿幸厥北為姊妹山出班竹其外即野人 寶峰山東向屏立其前下

分為二箐中垂石崖高穹兩旁倒挿箐底北箐之上環岡一支前達如堵墻石崖中裂鑿級懸其間名獼猴梯梯南玉皇閣倚其下梯北純陽閣踞其上舊有額名為太極懸崖而吳參戎又大書鐫其上曰奠高山大川純陽閣之上則開軒三楹左右當懸箐之中而下臨絕壑向東北近則環岡前伏平川達其下遠則東山之外高黎貢北尖峯特出眾山之頂

對其中 此峯土人又名為小雪山遙峰橫亘天半而其上特聳一尖如拱圭蓋在分水關之北二十里關間無路能上亦不能見至此乃東見之馬鞍山寶藏之徒徑空昔在戎行時曾從赤土舖北度龍川至其下為高簡槽有居人段姓者導之登其頂目界甚爽其後為三清殿則邵道所栖也其高蓋四十里云

三清殿去西頂不遙余前從之下蓋是山之最高者爲三清殿東北向當石壁而居一山之中者爲玉皇閣東向居北箐之北倚環岡腋間者爲寶峰寺南向玉皇閣當石壁下兩箐夾之得地脈之正而純陽閣孤懸崖間從蓮花尖上現神奇是奇正相生之妙也蓋騰陽多土山而此山又以土山獨裹石崖於中如穎躍於囊且兩箐中怪樹奇株鬱葱密竹之大者如吾地之貓竹中者如吾地之筋竹小者如吾地之淡竹無所不有又非迤東西所有也

廷甲按舊有額至大川廿五字宜從楊本節去已見十六日

二十一日飯後別邵道下純陽閣東經太極崖其處若橫北等而上半里而達寶峰寺余以南箐懸峭昨所未經乃從大

路循玉皇閣下懸崖曲折下半里又度北箐之下峽從環岡大道復半里北上寶峰寺問道於尼尼引出殿左峰頭指山下核桃園直北爲尖山道西北登嶺爲打鷹山道聞打鷹山有北直僧新開其地頗異乃先趨打鷹於是東北下坡一里抵坡北又北一里餘有數家倚西山麓是爲核桃園其西北有岫頗低乃寶峰之從北度脊者有大道西向之有小溪東注逾之直北一里餘乃西北登坡四里逾坡脊而西是名長坡又西半里乃轉而北挾西峰而循其北仍西行脊上其脊北下卽酒店嶺之東度爲筆峰龍窰者南下卽野猪坡之南出爲鵝籠緬箐者蓋俱從分支之脊行也西五里嶺岫間路

交十字乃西北橫陟之當從北躡坡誤從西行嶺之南二里
遇樵者知爲鬼甸道打鷹開寺處已在直北雙峰下然此時
已不見雙峰亦不見路影乃躡棘披礫直上者三里霧氣襲
峰或合或開又上二里乃得亂坪小峰環合之中多迴壑竹
叢雜布見有撐架數柱於北峰下者從壑中趨之仍無路柱
左有篷一龕僧寶藏見余迎入其中始知卽開山之人也因
與余遍觀形勢飯後霧稍開余欲行寶藏固留止一宵余乃
從其後山中垂處上其山乃中起之泡也其後復下大山自
後迴環之上起兩峰而中岫遙望之狀如馬鞍故又名馬鞍
山據土人言其上多鷹舊志名爲集鷹山而土音又譌爲打

鷹云其山脈北自冠子坪南聳從頂上分二岐一峙西南一
峙東北二峰之支如抱臂前環西南下者當壑右而伏過中
復起小阜而爲中案南墜而下復起一峰爲前案東北下者
當壑左而伏結爲東窪之鑰兩峰岫處正其環窩處前蹲一
峯當窩中其脈復自東北峰降而中度宛如一珠之托盤中
其前復起兩小阜如二乳之列於胸其脈卽自中蹲之峰從
左度右又從右前度而復起一阜於中與雙乳又成鼎足前
列爲中峰近案卽南與中案並峙稍度而東又起一阜卽北
與東窪之鑰對夾故兩乳之前左右俱有窪中岫中峯之後
左右亦有峽中局其脈若甚平而一起一伏隱然可尋其兩

遊記 演九
峰之高者左右皆環而止唯中之伏而起者一線前度其東
爲筆峰龍窠南爲寶峰龍光者皆是脉也土人言三十年前
其上皆大木巨竹蒙蔽無隙中有龍潭四深莫能測足聲至
則湧波而起人莫敢近後有牧羊者一雷而震斃羊五六百
及牧者數人連日夜火大樹深篁燎無子遺而潭亦成陸今
山下有出水之穴俱從山根分逗云山頂之石色赭赤而質
輕浮狀如蜂房爲浮沫結成者雖大至合抱而兩指可攜然
其質仍堅真劫灰之餘也寶藏架廬在中峰之下前臨兩乳
日後有擴而大者後可累峯而上前可跨乳爲鐘鼓之樓云
今諸窪雖中胸而不受滴水東窪之上依石爲窞有儲水一

方豈龍去而滄桑倏易獨留此一勺以爲開山之供者耶寶
藏本北直人自雞足寶臺來見尖山雖中懸而無重裹與其
徒徑空覓山至此遂龕坐篷處者二年今州人皆爲感動爭
負木運竹先爲結此一楹而尙未大就云徑空四川人向從
戎爲選鋒復重慶援遼援黔所向有功後爲騰越叅府旗牌
薙髮於甘露寺從師覓山師獨坐空山徑空募化山下爲然
一指開剏此山俱異人也是晚宿龕中有一行脚僧亦留爲
僧薙地者乃余鄉張涇橋人蕭姓號無念名道明見之如見故人焉
二十二日晨起宿霧淨盡寶藏先以點餉余與余周厯峰前
憑臨而南爲南甸其外有橫山前列則龍川後之界也近嵌

麓西爲鬼甸其外有重峰西擁則古勇前南下之支也下伏而東度爲筆峰其外有高嶺東穹則高黎貢後聳之脈也惟北向則本山後屏焉然昨已登嶺北眺知東北之豁處爲龍川所合西北之叢處爲尖山所懸而直北明光六廠之外皆野人之栖矣久之乃飯而別寶藏命其徒徑空前導從東北行皆未開之徑也始逾東環之臂即東北下雖無徑而煩坦三里餘有路循嶺北西去往鬼甸道蓋是山前後皆向鬼甸道也於是交之仍東下甚峻一里又有路自東南來西北逾嶺去此卽州中趨冠子坪道蓋冠子坪從北南度穹起打鷹之頂自北望之不見雙峰如鞍祇覺層起如冠逾脊西下是

爲坪邨所托有龍潭西湧乃鬼甸上流經鷺籠而南下者也余交其路仍東北下行莽棘中一里餘北向下傍西小峽漸有微徑徑右峽中亦有叢竹深藤東轉再逾一峽一里乃北行環岡上岡之西大山始有峽中盤岡之東始隨坡東下共二里抵坡麓則響水溝之峽在其東矣有溪自西峽出北涉之隨西山北行西山至是稍開有路西入之交其路而北一里餘稍下又有小水從西塢出是爲王家壩以此水爲界南俱沐府莊又北半里遂與南來大路合又北一里有邨在西山下至是中塢始開其塢南從酒店脊來北至此東西乃闢溪沿東麓北下邨倚西山東向而路出其中又北里許有峽東北往界頭

游記 漢九
余循西山西北下渡一小峽半里西轉其南谷爲灣腰村蓋
王家壩之後山也其北塢爲左所屯乃龍從北又起一峰其
餘支西北而環者塢中始有田疇下關響水溝之流亦西北
貫之而路從南山西向行一里餘有小水北流又西一里餘
有結茅賣漿在南山下於是巨松錯立高影深陰午日俱碧
又西二里爲馬站其北坡下頗有隔林之廬而當路左者止
一家州來者皆飯焉其西北田陞環坡從田中西北行一里
餘抵北山下稍西復北一里逾其峒有墟場爲馬站街房其
北山坡襍沓石齒高下東岡與西山遂夾溪北注共三里有
山橫於前乃西隨之半里北透其峒其北則山開而下盤環

壑溪從西山透南峽來遶壑北去固知透峒之山乃自南而
西轉峒西一峰卽西盡於溪者也盤壑而西北一里餘遂循
溪東岸行其西岡松檜稠密有大寺基在焉乃飯於溪旁又
北半里爲邱坡有兩三家倚西山其西則羣山中迸爲峽
有岐西入之爲古勇道其東則谷口橫拓南北之水俱由之
出焉於是北行田塍間二里屢逾其分流之水又北一里餘
爲順江邨古之順江州治也西山至是中斷復起其特聳頗
厲是爲三清山邨多環石爲垣連竹成陰者又北半里有水
自西峽來東向而注是爲順江有木梁跨其上順江邨之東
山塢東關過橋復北上坡行竹徑中半里北下過乾海子一

里餘北上坡有虛茅在坡北是為順江街子復西北行坡坂間其坂西倚三清山東臨夾壑壑之東則江東山南下而橫止焉從此三清西亘江東東屏又成南北之塢行坂間三里北向稍下忽聞水聲則路東有溪反自南而北至是乃東轉去想順江之分流而至者蓋江東山之西已有兩江自北而來此流何以反北耶流既東路遂北盤東垂之坡二里是為雞茨坪逾坪北下一里餘復得平疇有賣漿者當路右於是東北行田塍間一里餘有江自西北注東南長木橋橫跨之是為西江其東又有一江自東北注東南沿東山與西江並南行塢中是為東江既度西江橋遂北行江夾中一里而至

固棟宿於新街固棟一名峇棟聚落當大塢中東西二江夾之其北則雅烏山南垂橫亘兩山間至此而止其南則兩江交合於三里外合流東南去至曲尺入龍川江東則江東山北自石洞東南向而下西則三清山北又起一峰南與三清雁行而峙其中有峽如門而小甸之路從之是峰即雲峰尖山東下北轉之脈雲峰正在其西為彼所掩故固棟止西見此山而不見雲峰也其地直東與瓦甸對直西與雲峰對直北與熱水塘對直南與馬站對有新舊二街南為新北為舊二十三日命主人取園筍為晨供味與吾鄉同八九月間有 貶味有 香氣 北一里過舊街買飛松一柵於劉姓者家飛松者一

名狐寶亦作梧實正如梧桐子而大倍之色味亦如梧桐而
殼薄易剝生密樹中一見輒伐樹乃可得遲則樹卽存而子
俱飛去成空株矣故曰飛松惟巔塘關外野人境有之野人
時以茶蠟黑魚飛松四種入關易鹽布其人無衣與裳惟以
布一幅束其陰上體以被一方幃而裹之不復知有衿袖之
屬也此野人卽茶山之彝昔亦內屬今非王化所及矣然謂
之紅毛則不然也又北二里餘橫岡後亘望之若東西交屬
於兩界崇山不復知其內有兩江之嵌於兩旁也此岡卽雅
烏山南垂盡處東西二江皆從其兩腋南出疑卽挨河而土
人譌爲雅烏耳陟岡而北又二里岡左漸突而成峰岡右漸

嵌而爲坑路漸逾坑傍峰而上於是坑兩旁皆峰復漸成峽
循峽西峯行二里陟其北嶠遂挾西峰之北而西向下二里
路右有大栗樹一株頗巨而火空其中路左則西江自西壑
盤曲東來破峽而東南去於是出固棟西山之西北矣始下
見盤壑西開江盤壑底而尖山兀然立其西南矣又西下一
里隨江北岸西行二里始有邨廬倚岡頭是爲烏索其江反
北向折而來路乃南下岡就之半里則長木橋橫架江上反
自西而東度之橋東復有竹有廬從其側轉而西南則固棟
西山與尖峰後大山圍環其南而江曲其北者也又西半里
有邨連竹甚盛半里從其邨南西轉復行岡坂者二里岡頭

巨松錯落居廬倚之半里西向下涉一坑又西南一里餘連過兩邨又西向下涉一坑始及山麓遂西向上半里有小水注坡坂間就而滌體時日色亭午解衣浣濯久之乃西南循小徑上一里轉而西始與東來路合時雷雨大至行草徑間一里稍西下涉一峽底於是巨木叅霄緯藤蒙塢遂極幽峭之勢盤峽嘴而西一里又涉一峽底二峽皆在深木中有小水淙淙自北而南下注西來之溪合而東行北出者也涉峽之西崖有巨石突立崖右路由巨石之東北向上曲折躋樹蔭中高崖滴翠深木篩金始知雨霽日來陰晴弄影不碍凌空之展也上三里遂陟岡脊脊兩崖皆墜深涵碧聞水聲潺

潺在其底而不辨其底也脊狹不及七尺而當其中復有鋪木以度者蓋脊兩旁皆削中復有窞下陷故以木填之行脊上一里北復稍下又涉一南墜之峽半里乃西北上其上甚峻一里餘而飯稍夷轉西南盤而北半里復曲折上峻愈甚一里又稍夷循峰崖而轉其腰始望見尖峯在隔等隴樹間而不知所循者亦一尖峰也北半里抵其峰西腋稍西下度一脊遂西上上皆懸崖削磴迴顧前所盤脊東峰亦一峰復聳山頭尖削亦堪與尖山伯仲但尖山純石中懸而彼乃土峰前出耳兩峰之北復與西大山夾成深壑支條盤突箐樹蒙蔽如翠濤沉霧深深在下而莫窮端倪惟聞猿聲千百唱

和其間而人莫至也峰頭就豎石鑿級爲梯似太華之蒼龍脊兩旁皆危崖而石脊中垂闊僅尺許若龍之垂尾以度而級隨之仰望但見層累不盡而亦不能竟其端倪也梯凡三轉一里而至其頂頂東西長五丈南北闊半之中蓋玉皇閣前三楹奉白衣大士後三楹奉三教聖人頂平者如是而止其向皆東臨前峰之尖南北夾閣爲側樓半懸空中北祠真武下臨北峽而兩頭懸榻以待客南祠山神下臨南峽而中殿爲齋堂皆川僧法界所營構蓋其上向雖有道而未開闢莫可栖托法界成之不及五年今復欲闢山麓爲下殿故往州未返余愛其幽峻遂止東側樓守寺二僧一下山負米一

供樵炊而已

二十四日晨起天色上霽四山咸露其翠微而山下甸中則平白氤氳如鋪絮又如瀟波無分遠近皆若浮翠無根嵌銀連疊不知其下復有坡淵邨陸之異也至如山外之山甸外之甸稍遠輒爲嵐掩翠映無能拈出獨此時層層襯白一片內一片外搜根剔奧雖掩其下而愈疏其上乃呼山僧與之指質遠近諸山一一表出因與懸南崖而下有崖前臨絕壑後倚峭壁中列橫罅下平上覆恰如匡牀雖小而可憩可卧是名仙牀俯層峭之下巉覆累累無可攀循僧指其下有仙洞須從梯級下至第二層轉崖下墜乃可得之遂導而行其

遊記 卷九
洞乃大石疊綴所成亂崖顛磴欲墜未墜進處爲罅覆處爲洞穿處爲門門不一竅洞不一層中欠寬平外支幽險若疊級架板亦可幽栖處也洞門東向腋中者爲大入而南穿一峽排空而下南出峽門其門南臨絕壑上來重崖有二木毬倒懸其前仰睇之其上垂藤自崖端懸空下丈餘卽結爲瘦如瓠匏之綴於蔓者瘦之端綴旁芽細枝上迎雨露茸茁天矯花葉不一狀亦有結細子員綴枝間者卽山僧亦不能名之但曰寄生或曰木膽而已一絲下垂結體空中馭風吸露形似膽懸命隨空寄其取意亦不誣也余心識其異欲取之而高懸數丈前卽崩岸直墜計無可得但其前有高樹自崖

隙上聳若得梯橫度樹間緣柯而上以長竹爲笈可鈎藤而截取之余乃識而行復隨導僧由梯級北下懸空之臺乃石脊一枝下瞰北壑三面盤空矯若龍首條岡迴壑紆鬱其下與仙洞各綴梯級之旁若左右垂珥洞倚南崖以幽峭見奇臺踞北壑以憑臨爲勝此峰前兩槩也由峰後西南越脊而下更多幽境近法界新開小路下十里至小甸乃固棟西向入峽經此而趨古勇之道其坡有熱水塘亦法界新開者由此東可出固棟西可窮古勇而余時有北探滇灘阿幸之興遂不及兼收云是午返寺同顧僕取斧縛竿負梯而往得以前法升木取瘦而崖高峽墜木杪難於著力久而後得之一

瘦圓若葫蘆倒垂上大下小中環的頸一瘦環若巨玦兩端圓湊而中空皆藤懸於上而枝發於下如玦者輕而鬆如葫蘆者堅而重余不能兼收後行時置輕負堅者而走

二十五日余留二詩於山負木膽於肩從東大道下梯級一里餘東度過岫遂東南循前峰之腰又半里東度脊項於是俱深木夾道曲折峻下者二里涉一南盤峽復東北上半里凌脊乃東行脊間左右皆夾壑甚深而重木翳之又半里度脊間鋪木又東南半里復盤壑東北下二里至前巨石之左遂涉南下之溪半里復東逾一岡又半里再涉一南下之溪口向稍上遂出箐東北行一里至下院分岐之路仍從向來

之小路一里餘至前浴流之所又半里越塢而得一邨入問熱水塘道仍東北三里過烏索橋從橋西逾岡而北一里與大道合隨之西北循東山之麓行六里有岡自東山直對西峰而下驅江流漱西峰之麓而路亦因之與江遇已復逾岡北下北塢稍開有小水交流西注蒸氣襍沓而起卽熱水塘也半里抵塘上有池而無屋雨霏霏撲人及令顧僕守行囊於塘側北半里上坡觀其街子已散而無他物望南岡有邨廬在岫脊間街子人指其上有川人李翁家可歇復南半里迴覓之有閩人洪姓者向曾寓余鄉爲導入同寓余乃出就塘畔招顧僕入出携滄啖之問阿幸路須仍從此出此中東

至明光雖止隔一山險峻不可行也見日色尙早而雨止乃留熱水待出時浴并木膽寄李翁家菜園中遂仍西北行五里北上坡爲左所蓋其分屯處也其處居廬甚盛行者俱勸余宿此謂前皆燹彝家不可栖且多茶山彝出入不可晚行余不顧又北二里逾一坡又三里過後所屯漸折而從西北三里直逼西大山東北垂復與江遇迴顧尖山與前峯並峙中嶠如馬鞍而左所之南復有峰一支自西山突出橫亘其北故路必東北從烏索橋抵熱水塘又西北至此也此地正當尖山之北其北則西大山漸伏中遜而西爲滇灘過脈處東大山直亘而南分墜西竄下突小山橫界於北爲松山坡

坡之北卽阿幸北進之峽其西北高峰浮出於橫坡之上則阿幸滇灘之間又中界之一峰所謂土瓜山也行江東岸一里復折而東北一里抵東山腋下山峰叢立處有兩三家倚東坡而栖是爲松山從其前又北一里上北山西亘之坡一里躡坡脊其脊正西與巔塘相對有塢西盤而江水自北橫界脊下脊若堵墻湖水北上從脊間行二里乃西北下半里有石屏西向立峰頭是爲土主碑乃神之所托也從石西隨坡下涉江西上乃滇灘關道已茅塞不通惟茶山野人間從此出入負茶臘紅藤飛松黑魚與松山固棟諸土人交易鹽布中國亦間有出者以多爲所掠不甚往也其關昔有守者

滇九
以不能安居多遁去不處今關廢而田蕪寂爲狐兔之穴矣
其隘亦紆坦不甚崇險去此三里已望而知之遂北下坡一
道從塢間溯江東岸北行爲度橋捷徑一道沿東坡北上爲
托宿之所乃下半里渡東來小澗復上東坡北隨之行二里
有四五家倚東山而居卽托宿之所也其主人王姓者夫婦
俱伐木山中未歸余將西度橋望西山下投栖聞其地江岸
西廬乃土舍所托皆不納客納客者惟東岸王店方躊躇間
一鋤於田者乃王之隣謂其婦亦入山未歸不識可徐待之
否余乃還待於其門久之婦歸爲汲水而炊此地名土瓜山
西乃滇灘東北高峰南下之支東乃雅烏直北崇亘之嶺中

夾成塢江流貫其間南則土主碑之橫岡自東而西突北則
土瓜山之東嶺自西而東突中界此塢南別松山坡北別阿
幸厰而自成函蓋於中蓋滇灘土巡檢昔爲某姓已絕今爲
土居之雄者曰龍氏與此隔江相向雖未授職而儼然以土
舍自居矣

二十六日凌晨起飯西下行田間半里抵江岸溯江北行有
木橋跨江而西度之復溯江西岸北行一里北上坡半里折
而東盤其東突之嘴半里復轉而北從坡上行西循峰腰東
瞰江流塢底至此遂東而爲峽隔峽瞻東山之崖崩石凌空
巖巖上擁峽中之水北自阿幸厰北姊妹山發源南下南趨

烏索而爲固棟西江者也東西兩界山自姊妹山分支西下穹爲滇灘東北峰而下爲土瓜山東下穹爲阿幸東山而南接雅烏東山之東西爲明光南爲南香甸第此山峻隔路仄難逾故行者避之北行西坡五里稍下有小澗自西而東涉之北上於是屢陟東突之坡再渡東流之澗八里西坪稍開然北瞻姊妹反茫不可見又北二里盤西山之嘴始復見姊妹山北倚而前壑之下爐烟氤氳廬在焉遂五里而至廠廠皆茅舍有大爐小爐其礦爲紫色巨塊如辰砂之狀有一某姓者方將開爐見余而留飯於龕中言其北姊妹山後卽爲野人出沒之地荒漠無人居而此中時爲野人所擾每凌

晨逾箐至雖不滿四五十人而藥箭甚毒中之無不斃者其妻與子俱沒於此現葬山前姊妹山出班竹北去此三十里可望而盡不必登明光逾峻而過東去此四十里然徑仄無行者恐箐深蔓翳亦不可行乃遂出仍二十里下土瓜山又一里過江橋而東乃沿江南隨塢中捷徑二里抵西南坡下江漱坡而南路稍東逾東峽來小澗其澗西注於江卽前涉土主碑坡北之流江之西亦有小澗自滇灘南來東注於江其處乃正流之會也復東南上坡半里至石屏土主碑下與前來之道合又南越岡而下過松山及諸所二十里而入熱水塘李老家時猶下午遍觀熱水所洩其出甚異蓋塢有中

小水自東峽中注而西者冷泉也小水之左右泉孔隨地而出其大如管噴竅而上作鼓沸狀滔滔有聲躍起水面者二三寸其熱如沸有數孔突出一處者有從石窞中斜噴者其熱尤甚土人就其下流作一圓池而露浴之余畏其熱不能下體僅踞池中石上拂拭之而已外即冷泉交流若導入侵之即可浴此冷泉南坡之熱水也其北倚東坡之下復有數處或出於砂孔或出於石窞其前亦作圓池而熱亦如之兩池相望而溢孔不啻百也

二十七日晨起飯而行仍取木膽肩負之由岡東南下峽一里餘復有烟氣鬱勃則熱水復溢塢中與冷水交流而西出峽其塢皆東大山之環壑也由其南復上坡里餘有坑自東山橫截而西若塹界之者其下亦水流淙淙隨坑東向上一里從坑墜處南渡其上蓋其東未渡處亦盤壑成坪有邨倚東峰下路當其西南半里有岐一南行坡上一東向邨間余意向東者乃邨中路遂循東峰南行前望尖山甚近三里稍下見一塢橫前其西下即烏索之旁邨其南逾即雅烏之西幽矣乃悟此爲固棟道亟轉而東莽行坡坂間一里得南來大路乃知此爲固棟向南香甸道從之漸東北上一里稍平東向半里復上坡平上者一里行峰頭稍轉而南半里即南雅烏之脊也從其上可南眺龍嵒山而北來之嶺從其北下

墜爲峒復起此坡東隨塢脊平行半里乃東北下抵峒東則有路西自峒中來者乃熱水塘正道當從墜坑東邨之峻上今誤迂而南也於是又東下一里餘其下盤而爲坪當北山之東山界頗開中無阡塍但豐草芄芄東北一峰東突截業前標卽石房洞山也其後乃西北而屬於西山西山則自北而南如屏之列卽自熱水堤之東而南度雅烏者也於是循西山又北下半里見有兩三家倚南坡而廬下頗有小流東向而墜而路出其西北莫可問爲何所已而遇一人執而詢之其入曰雅烏山邨也亟馳去後乃知此爲畏途行者俱不敢停趾而余貿貿焉自適也又北一里再逾一東突之坡一

里登其峒中始覺東江之形自其南破雅烏東峽而去而猶不見江也北向東轉而下一里有峽自西北來卽截業後西北之山與西界夾而成者中有小水隨峽東出有小木橋度其上過而東遂循北山之麓始見南壑中東江盤曲向西南而破峽蓋此地北山東突而巖窠南山白石洞厰南盤旋西轉高聳爲江東山北嶺與北對夾截江西下中拓爲塢曲折其間路從其北東行一里有岐東南下塢中截流渡舟乃東趨石洞之道有路東北挾巖窠峰而轉乃北趨南香甸道於是東北一里餘轉巖窠峰東遙眺其塢大開自北而南東西分兩界夾之西山多東突之尖東山有巨屏之勢塢北豁然

遙達塢東則江東北嶂轟峙當夾惟東南一峽窈窕而入爲楊橋石洞之徑西南一塢宛轉而注爲東江穿峽之所先是余望此巖嶽之峰已覺其竒及環其麓仰見其盤亘之崖層聳疊上既東轉北向忽見層崖之上有洞東向欲一登而不見其徑欲捨之又不能竟去遂令顧僕停行李守木膽於路側余竟仰攀而上其上甚削半里之後土削不能受足以指攀草根而登已而草根亦不能受指幸而及石然石亦不堅踐之輒隕攀之亦隕間得一少粘者縳足挂指如平帖於壁不容移一步欲上既無援欲下亦無地生平所歷危境無逾於此蓋峭壁有之無此蘇土流土有之無此蘇石久之先試

得其兩手兩足四處不摧之石然後懸空移一手隨懸空移一足一手足牢然後懸空又移一手足幸石不墜又手足無力欲自墜久之幸攀而上又橫帖而南過其半里乃抵其北崖稍循而下墜始南轉入洞洞門穹然如半月上覆上多倒垂之乳中不甚深五丈之內後壁環擁下裂小門批隙而入丈餘卽止無他竒也出洞仍帖北崖西上難於橫帖之陟卽隨峽上躋冀有路北迂而下久之不得半里逾坡之西復仰其上崖高穹有洞當其下洞門南向益竭蹶從之半里入洞洞前有巨石當門門分爲二先從其西者入門以內輒隨巨石之後東轉其中夾成曲房透其東其中又旋爲後室然亦

丈餘而止不深入也旋從其東者出還眺巨石之上與洞頂之覆者尙餘丈餘門之東又環一石對之其石中懸如臺若置梯躡之所攬更奇也出洞循崖而北半里其下亦俱懸崖無路然皆草根懸綴遂坐而下墜以雙足向前兩手反而後揣草根畧逗其投空之勢順之一里下乃及其麓與顧僕見若更生也日將過午食携飯於路隅卽循西山北行三里而西山中遜又一里有邨倚西山塢中又半里選邨之前而北遂與江遇蓋江之西曲處也其邨西山後抱東江前揖而南北兩尖峰左右夾峙如旗鼓配合甚稱有小溪從後山流出傍邨就水皆環塍爲田是名喇哈寨亦山居之勝處也溯江

而北半里度小溪東注之橋復北上坡二里東北循北尖峰之東麓一里餘仰見尖峰之半有洞東向高穹其門甚峻上及峰頂如簷覆飛空乳垂於外檻橫於內而其下甚削似無陟境蓋其路從北坡橫陟也余時亦以負荷未釋遂先趨厰又北一里餘渡一西來之澗有邨廬接叢於江之西岸而礦爐滿布之是爲南香甸乃投寓於李老家時甫過午也先是余止存青蚨三十文攜之袖中計不能爲界頭返城之用然猶可糴米爲一日供迨石房洞扒山手足無主竟不知拋墮何所至是手無一文乃以褶襪裙三事懸於寓外冀售其一以爲行資久之一人以二百餘文買紬裙去余欣然沽酒市

肉令顧僕烹於寓余亟索飯乘晚探尖峰之洞乃從邨西溯西來之溪半里涉其南從焚彝廬後南躡坡迤邐南上一里遂造洞下洞內架廬三層皆五楹額其上曰雲巖寺始從其下層折而北升中層折而南升上層其中神像雜出然其前甚廠石乳自洞簷下垂於外長條短縷繽紛飄颺或中透而空明或交垂而反捲其狀甚異復極其北頂更穹盤而起乃因其勢上架一臺而臺之上而有龕西進復因其勢上架一閣又從臺北循崖置坡盤空而升洞頂氤氳之狀洞前飄酒之形收覽殆盡臺之北復進一小龕南向更因其勢而架梯通之前列以小坊題曰水月中供白衣大士余從來嫌洞中

置閣每掩洞勝惟此點綴得宜不惟無碍而更覺靈通不意殊方反得此神構也時洞中道人尚在廠未歸雲磴不封乳房無扁憑憩久之恨不攜囊托宿其內也洞之南復有一門駢啟其上亦有乳垂而其內高廣俱不及三之一石色赭黃如新鑿者攀其上級復透小穴西入二丈後曲而南其中漸黑而有水中貯上有滴瀝聲而下無旁泄竇亦神漢也洞中所酌惟此其中穴更深迴但爲水隔而黑不復涉而窮之乃下仍從北巖下循舊路二里返寓遂啜酒而卧不覺陶然南香甸余疑爲蘭香之譌蓋其甸在北不應以南稱也山自明光分派來西卽阿幸東南來之山東乃斜環而南至甸東

乃西突而南下夾江流於中其流亦發於明光北卽姊妹山
東行之脉也是爲固棟東江之源此中有明光六廠之名而
明光在甸中三十里實無廠也惟燒炭運甌以供此廠之鼓
煉此廠在甸中而出礦之穴在東峰最高處過雅烏北嶺卽
望而見之皆採挖之廠而非鼓煉之廠也東峰之東北有石
洞廠與西北之阿幸東南之灰窰共爲六廠云諸廠中惟此
廠居廬最盛然阿幸之礦紫塊如丹砂此中諸廠之礦皆黃
散如沙泥似不若阿幸者之重也

二十八日晨起霧甚平明飯而爲界頭之行其地在南香甸
東南隔大山大江各一重由南香東北大廠逾山則高壑重
疊路小而近由南香東南陽橋礦逾東嶺則深峽平夷路大
而遙時因霾黑小路莫行遂從土人趨陽橋道且可并攬所
云石洞也從邨東度江橋其橋東西橫架於東江之上覆亭
數楹由橋東卽隨江東岸循東山南向行東山者卽固棟江
東山之脉北自明光來至大廠稍曲而東南至是復西突而
南下屏立南香甸之東其上有礦穴當峰之頂茅舍緣之自
雅烏北嶺遙望以爲南香甸也至而後知爲朝陽出礦之洞
然今爲霧障卽咫尺東山一無所睹而此洞直以意想定之
而已南行八里則有峽自東山出遂東轉而蹈之其峽北卽
東山至此南盡南卽東嶺之轉西西臺於南香甸南爲江東

山北嶺者也開峽頗深有泉西出而注於東江卽昨所從巖
窠山前分岐渡江而東入之峽也峽徑雖深而兩崖逼仄循
北山東行二里望見峽內亂峰參差扼流躍穎亟趨之一里
至其下忽見北崖中迸夾峙如門路乃不溯澗東上竟北轉
入門蓋門左之崖石腳直插澗底路難外濼故入而內繞耳
由門以內仍東躡左崖之後一里遂逾亂峰之上蓋石峰三
四逐隊分行與流相磨獨存其骨耳循北峰攬澗南亂峰又
東一里路復北轉蹈北峰之隙北下半里則峰北又開一峽
自北而南與東來之峽會於北峰東突之下同穿亂峰之隙
而西所謂北峰者從大厰分支西南下卽南香甸東突之峰

余今所行路循其南垂向東者也其東南垂亦至是而盡是
山之西北有礦西臨南香甸者曰朝陽洞是山之東南有礦
東臨是峽者曰陽橋陽橋之礦亦多挑運就煎煉於南香則
知南香乃眾礦所聚也隨峽北望其內山迴壑闢有厰亦爐
烟勃勃是爲石洞厰所云石洞者大厰之脉至是分環西下
者自南香東界而南至陽橋下從峽中又東度一峰突爲虎
砂而包其內東下者亦南走而東環之至東嶺而西轉穹爲
江東山北境繞爲龍砂而包其外其水自石洞東南出合東
嶺北下之水西注於亂峰與陽橋度峽水合流西注東江是
石洞者衆山層裹中之一壑也從陽橋峽北望而見之峽中

度脈而東雖無中界之脊而水則兩分焉余時欲從峽趨石洞慮界頭前路難辨不若隨同行者去遂捨石洞從東峽溯流入三里則路東有峰前屏北界陽橋東度之峰至是東盡石洞之水隨東屏之山南出而西轉則陽橋南峽之上流也路抵東屏前山下亦分岐爲二東北溯石洞水逾嶺者爲橋頭路東南溯東嶺北下之水逾嶺者爲界頭路然則西下峽中之水以石洞者爲首以東嶺者爲次也於是東南上坡二里餘陟嶺巔是卽所謂陽橋東嶺矣逾嶺卽南下一里復陟峽而上從嶺上南行二里就其東南坡而下二里越東流之壑復稍上二里越其南坡再下有岐下東大峽爲同行者誤

而南一西餘始知其誤乃莽陟坡而東北一里遇西來道偕之東陟陞一里餘則龍川東江之源滔滔南逝繫藤爲橋於上以渡橋闊十四五丈以藤三四枝高絡於兩崖從樹杪中懸而反下編竹於藤上畧可置足兩旁亦橫竹爲欄以夾之蓋凡橋輦而中高此橋反挂而中垂一舉足輒搖蕩不已必手搯旁枝然後可移止可度人不可度馬也從橋東道陞上始有邨廬夾路二里復東上坡由坡脊東行其坡甚平自東界雪山橫垂而西下者行其上三里直抵東山下是爲界頭邨其邨倚東山而北夾廬成街而不見市集詢之知以旱故今日移街於西北江坡之間北與橋頭合街矣蓋此地旱卽

移街乃習俗也乃令顧僕買米而炊余又西北下抵街子視其擾擾而已不睹有奇貨也既乃還飯於界頭其地已在龍川江之東當高黎貢山西麓山勢正當穹隆處蓋高黎貢俗名崑崙岡故又稱為高崙山其發脈自崑崙南下至姊妹山西南行者滇灘關南高山東南行者繞小田大塘東至馬面關乃穹然南聳橫架天半為雪山為山心為分水關又南而抵芒市始降而稍散其南北之高穹者幾五百里云由芒市達木邦下為平坡直達緬甸而盡於海則信為崑崙正南之支也由界頭即從雪山西麓南行屢逾西突之坡十五里遙望羅古城倚東山坡間有寺臨之

此城乃土蠻所築之遺址其寺頗大有路從此

逾雪山 又南二里過磨石河又南二里越一山又逾一西突

之峒又南二里過一小木橋又南一里越一坡乃循坡東轉二里抵東南峽口有山自東大山南環而峙於門大路逾坡而南上小徑就峽而西南乃就峽口出則前所過藤橋江亦自塢北來遂循其東岸而南三里始有邨倚江岸乃傍邨南行又一里宿瓦甸瀨江東岸亦南北大塢也邨塍連絡東向大山即雪山漸南與山心近矣

二十九日飯而平明隨江東岸行二里餘兩岸石峰交合水流峽間人踰崖上江為崖所束奔流若線而中甚淵深峽中多沸水之石激流盪波而漁者夾流置罾於石影間攬瑤曳

遊記 滇九
翠無間得魚與否固自勝也半里越崖南下江亦出峽有石
浮波面儼然一鼉鼉隨水出也又南二里過上莊有山西突
中夾塢成田邨倚突峰之東江曲突峰之西而路循塢中逾
脊而西南又一里餘復與江遇而兩崖復成峽石之突峽迎
流與醫之夾流曳翠亦復如前也一里江曲而西路從江之
南亦曲而西截向北之塢於是北望隔江南下之山至是中
分其東支已盡橫突而東卽西峽之繞而下者其西支猶橫
突西南卽固棟兩江所合而南盤者兩支之中北邈成塢而
灰窰厥臨其上焉是厥亦六厥之一所出礦重於他處昔封
之而今復開則不及他處矣西一里復上一北突小岡有竹

環坡結廬其中者是爲苦竹岡越而南下共一里又越塢南
上遂從坡上南行二里江隨西峰之嘴曲而東南始艤舟而
渡其西岸隨西山南行一里坡尾東掉路亦隨而東南逾之
一里有一二家倚坡北向而居由其東更南上一里遂逾其
東下之脊南行脊間二里復稍下有小峽自西而東其峽甚
逼中有小水搗坑東出乃下半里稍西轉迎流行峽中有數
家倚峽北是爲曲石而峽之西其內反闕而成塢亦有邨廬
倚之則峽水之所從來也於是南截峽流又上坡行坡間二
里有邨當路左亦曲石之邨廬也又南三里乃隨坡西轉始
見坡南塢大開水東貫之則固棟兩江合而與順江響水溝

諸流一併東出者也循此坡稍北卽與界頭瓦甸之江合是爲龍川江之上流蓋交會於曲除者也固棟之江東山自石洞南度脊亦中盡於曲除者也余先自固棟厯其西又從陽橋東嶺逾其北又從瓦甸瞻其東又從灰窰曲石轉其南蓋江流夾其三方而余行周其四隅矣西行一里又南向峻下者一里及塢底有橋跨江亦鐵鎖交絡而覆亭於上者是爲曲石橋按一統志龍川江上有藤橋二其一在回石按江之上下無回石之名其卽曲石之誤耶豈其橋昔乃藤懸而後易鐵鎖耶於是從江南岸上坡西向由峽上二里餘復南向陟嶺二里餘登嶺頭有三四家當嶺而居是爲酒店以賣漿

得名也飯而行循嶺東南向二里下稍西轉復南行坡上又二里稍下陟一塢而上又南二里過陳揮使莊又南隨峽中行二里有隴環前峽折而自西來有岐直南躡其隴余乃隨衆從峽中西行半里漸西上又半里折而南上又半里南登隴脊始逾東度之脈於是南望前壑大開直南與羅生山相對其中成塢甚遙州城隱隱在三十里外東之球璋亦可全見惟西之寶峰又西北之集鷹皆爲龍窰南下之支所掩不得而見焉余先賈勇獨上躡草而坐久之後行者至謂其地前有盜自東山峽中來截路而劫促余並馳南下東望層峽重巒似有尋幽之徑而行者惟恐不去之速也下二里望見

澄波滙山麓余以爲卽上千峩清海子矣又峻下二里有邨
廬當海子北岸竹徑扶踈層巒環其後澄潭映其前路轉其
東北隅有小水自峽間下注有賣漿之廬當其下入而少憩
以所負木膽浸注峽泉間且問此海子卽上千峩澄鏡池否
其人漫應之但謂海中有魚有泛舟而捕者以時插秧止以
供漁不遑出賣然余憶志言下海子魚可捕上海子魚不可
捕豈其言今不驗耶循海東峻麓行二里及海子南濱遇耕
者再問之始知此乃下海子上海子所云澄鏡池者尙在邨
東北重山之上由此而上五里乃及之余不能從南二里越
一澗有邨連竹甚深是爲中干峩邨由邨南又南下三里其

邨竹廬交映更遙是爲下干峩邨至是東坡之下關爲深塢
而溪流南貫由是從邨南稍西卽轉南向隨坡上行一里漸
南下俯瞰塢中溪流已有刺小舟而浮者旣而南行二里有
一二家倚坡灣而居與下干峩南北遙對從此東向隨坡上
半里乃躡坡之東嘴從其上南轉則東嘴之下其崖甚峻又
數十家倚其麓而居竹樹蒙茸俯瞰若不可得而窺也南半
里稍西復轉而南半里崖下居廬旣盡忽見一大溪東向而
橫於前乃透崖而出石穴者崖峻無路下墜沿崖端南行半
里稍下見有徑下沿坡麓乃令顧僕守木膽於路隅余策杖
墜麓循崖北轉又半里投叢木中則其下石穴交流土人以

石堤堰水北注堤之上廻流成潭□□□尺堤之下噴壑成溪闊幾盈四五丈泉之溢處俱從樹根石眼糾繆中出陰森沁骨掬而飲之腑臟透徹悔不攜木膽來一段而浸之也既乃仍南沿崖麓半里至顧奴候處取木膽負而行又南二里下坡有數家當坡之東指余東向逾梁其梁其西跨千巖下流之溪志所謂馬場河也逾梁東卽東南逾田塍間三里抵東山下又有溪自東而西有梁南北跨之是爲迎鳳橋以其西有飛鳳山也橋下水卽東南出於赤土坡者北流至羅武塘出馬邑邨西向經此而與馬場河合過橋遂直趨而南二里再南逾一梁梁下水如綫將絕則黃坡泉之向北而西

轉者又南一里又南逾一梁其水亦將絕則飲馬河之向北而西轉者又南一里入騰越北門行城中二里出南門城中無市肆不若南關外之喧填也抵寓已下午矣

下缺

裔孫 熙海南校字

遊記第八冊下終

